



Михаил Елькин

★
Кодзула Эжа

Михаил Елькин



Кодзула Эжа

Кывбурьяс

Сыктывкар
Коми Республикаса гижысь котыр
2013

ББК 84(2=664.2)–5

Е 56

*Издание осуществлено при финансовой поддержке
Агентства Республики Коми по печати и массовым коммуникациям*

Серпасалис небөгсö Ю.Н. Лисовский

ЕЛЬКИН М.А.

Е 56 Кодзула эжа. Кывбурьяс.– Сыктывкар: Коми Республикаса гижысь котыр, 2013.– 144 лист бок.

ISBN 978-5-7934-0545-4

Михаил Елькинлөн кывбурьясын лыддысьысь аддзас чужан мусö, сэни олысь йöзöс. Гижöдьясас поэт мöвпалö муслун, олöм да кулöм, быд лоöмтор вöсна мортлөн кывкутöм йылысь.

ББК 84(2=664.2)–5

ISBN 978-5-7934-0545-4

© Елькин М.А., 2013

© Лисовский Ю.Н., 2013

© Коми Республикаса гижысь котыр, 2013

КОДЗУЛА ЭЖА



* * *

Кор вортассо шоныда сывъялө кыа,
А лун төлыс кыз пулы көсаяс кыө,

Кор йи торйөн төлыс лөзыюгыдас сылө,
И быттьökө жыннан шы энэжас кылө –

Сэк лэбачьяс сьылөмысь арлыдөй повзьö,
Да кыз кор моз сьөлөмын кыпыдлун ловзьö.

Кор тувсовья зэръясысь мичаммө вöрыс –
Сэк кокньыдик төвруөн коляоз көрыс

Шог мөвпясысь вежөрös бурдөдны волö
Да быттьö том кадсянь мем вайлывлö чолөм...

* * *

Лөсасъяс ог вөчав,
Воясөс ог артав...
Тулыс – шонді коча,
Гожом – гыма-чарда.

Ставыс меным матыс,
Ставсьыс лолөй пөтө.
Ола ме быд кадө
Ывлаыскөд өтув.

Шондіа кө – долыд.
Зэркөд лөня шогся.
Вөр-ва мичнас олөм
Мезда ковтөм ёгсьыс.

Но, а вояс – вояс...
Мый и накөд вөчан?
Майбыр, луна-вояс
Эм на – ола-жөдза.

Матө, сьөлөм дорө
Босьта ывла мичсө!
Вөр-ва сьылан горас
Сьыланкывйөн йитча.

ДЗОРИДЗЬЯС

Сылö гоҗся шонді биысь
Мазі гора виддзаин.
Сэні, пöлөзнича пиас,
Тшөтш и уна катшасин.

Сыысь виддзыс лөза-еджыд,
Бытьё чышъянаис ань.
Синмыд шойччө гоҗся веҗас,
Кокни лов вылад и шань.

Вуджа асывнас ю саяс,
Вөча видз пөлөныс кытш –
Гортө дзоридзьяссө вая,
Мичмөдыштны керка пытш.

Сэсся дыр на лоа видза,
Дыр на кок йылысь ог пөр.
Лөксыйс, висьөмъясыйс видзас
Менө маа дзоридз көр.

* * *

Ловтö и вежöртö бонзьöдö олöм...
Мöвпыштлан – ставсö нин эновтны колö.

Ланьтны – да ас вöсна тöждөн и овны...
Олöмыд аслад – и некодысь повны.

Аслыд и овны, да шондiсьыс яндзим –
Сiйö öд ставсö на вывсяньыс аддзö.

Кытчö на дзебсян, кор лун тöлыс борда,
Öшиньтö восьтан – и пыралас гортад.

Шондiыс пуксяс да рыт татчö лэбас –
Весьшöрö чайтан, мый пемыдас дзебас:

Пöль-пöчö кадьясянь важ моз на вежа
Му весьтас тöлыся-кодзула эжа.

ТӨВСЯ СЁРНИ

I

Бара чужан грездöй лымйöн тыри –
Тулысöдзыс овны эбöс быри.

Шыш моз гусьöн ветлöдлыны пондiс
Вөр пöлöныс гыöралöм шондi.

Дыр на лымья турöбьяслы дурны!
Луньюгдсьыс сёлöмöй оз бурмы.

Сöмын войнас, лöзов-эзысь чöлас,
Чöжсьöм шогсьыс мездлун аддзö сёлöм.

...Шоныд жырйын майшася да турда,
Бвла вылас – шонавла да бурда.

II

Ылалёма менам грездө вотөдз,
Юёма съөд войыс садьтөм кодөдз.

Весьтам весиг югөртор оз вирдышт,
Пемыд, некөн абу кодзув дзирдыс.

Войыс шогөс эз тай пукты пыдди,
Бөрья гажөс кодалөмнас мырддис.

Енвевт зарни-эзысь чача бияс
Вошталёма джуджыд тола пиас...

Өні, гашкө, тулысөдз оз сюрны,
Медым выльысь енэж бердас вурны...

* * *

Бать, мам да вок паметьлы

Мыйла нө арлыдтөг кулід...
Асьныд тай олігад шулід:
Майбырөй, виддза и вёра,
Таладор югыдыс көра.

Кытчөкө век кежлө мунід...
Шаньыс да мичаыс вуні.
Гажтөмөсь виддзыс и вёрыс,
Озья и намыра нёрыс.

Быттьөкө ен гулю бордтөг –
Тиянтөг коли и горттөг.
Тыртөма керкаөс тола...
Кытчө нө, код ордө вола?

Век кежлө вой төвкөд йитөм –
Олөмөй пачтөм и битөм.
Ловья, а быттьөкө ловтөм –
Өтнам и некодлы ковтөм.

* * *

Му весьтас вой төв ыджыдало – ар нин...
И öзйö кисьмөм вотöсьяснас жов.
И кыдзьяс улын чукөрьясөн зарни –
Да сы вылө он ньöб и чепöль сов.

И войыс водз нин локтö мөдлапöлысь,
А рытлөн олан кадыс öнi – сутш.
Дзик эзысь пыж кодь енвевт шöрас тöлысь –
Да гожöмас сы вылын бөр он вудж.

И сьылö вой төв, гөлöс ассьыс ёсьтö –
И сьыланкывсьыс ывла нöшта шог.
И менам öдзöс вой шөрöдзыс восьса –
Да некод некор ме дiнö оз лок.

* * *

И бара войыс лунсö венö,
И некод пемыдсьыс оз видз...
И войыс кодзула, но меным
Дзик веськодь енэжыслөн мич.

И енвевт шöрас тöлысь койтöм
Оз кыпöд олан руöс войт –
Му весьтас кывтысь эзысь мойдыс
Оз гажöд менö и оз дойд.

И весиг Выль во гаж кор öзйö,
Ме сэки йöз дорö ог пет –
Мый ассянь войтырыслы вöзья?
Мед метöг гажöдчöны, мед...

Шог мөвпьяс песысь – кодлы кола,
Öд гажöдчыны абу вын...
Кузь тövбыд лöня узьö лолöй,
И сьölöм тулысöдзыс кын...

* * *

Асыввывсө алöй кыа визьö
Кизялöма шондi зарни кизьöн.

Öзтiс тулыс ловъяыслысь вирсö!
Сьöлöм пытшкысь сывдiс чорзьöм сирсö.

Майбыр, енвевт лöзовьюгыд кеня!
Егыр-расыс – быттьö ая-эня.

Сийöн кыскö кызьяс-козьяс ордö –
Карсьыс татчö вола, быттьö гортö.

Батьсянь-мамсянь вичмис меным олöм.
Егыр-рассянь – кывбуралысь лолöй.

Медся ёна чужанiнкöд йитö –
Егыр-рассянь бокун лолöй битöм.

Кодыр татчö вола – кык пöв ола:
Колипöн и мортöн танi лола.

Танi чужан му быд емöн-корйöн
Олöмöс да сыланкывйöс дорйö...

* * *

Көть кольёма радейтан кадыс –
Да тулысыс сёлөмлы матыс.

Дзик вөр-ва моз сёлөмөй ловзьё –
Лөнь керкаын сылы оз овсы.

Зэв кыпыда тiпкыны пондө...
А төлыслыс ыпъялыс шондi

Кыз эшкынсö му вывсьыс кульö
Да кок увтö ыркөдö ульөн.

Но шöйта ме гөпъяссьыс повтöг
И здукъясөн серавла ковтöг.

А нывъясыс! Вескыда синмö
Быд видзөдлас шоныда инмö.

Ой, унатор тулысыс мойдö –
Да сийö тай сёлөмөс дойдö,

Мый кольёма радейтан кадыс,
Көть тулысыс сёлөмлы матыс...

* * *

Рифмуйтлі мусö и вöрсö,
Васö, и юсö, и йöрсö.

Рифмуйтлі рытсö и войсö!
Долыдсö, жугыльсö, дойсö...

Таласö и мöдлапöвсö!
Юргöмсö, ызгöмсö, чöвсö.

Рифмуйтлі гожöм и тулыс
Копырöн ас чужан мулы.

Зэр шы и гымыслысь равзöм –
Рифмуйтлі олöмын ставсö.

Сöмын тай «радейта» кылыс
Мыйлакö нэмö эз ылав.

Бокиті исковтіс ёльöн,
Рифмуйттöг сідзи и коли...

ТУРУНВИЖ

Гожомлань пöлынтьчис тулыслöн тасыс!
Турунвиж бипурöн ыпмуни расыс.

Турунвиж саридзöн ойдöма виддзыс –
Мудзöма мичлунсö му улас видзны.

Весигтö сынöдыс турунвиж көра –
Турунвиж шыяс ме кыла веж вöрас.

Турунвиж пемыдöн вевттысьсö войыс...
Турунвиж бикиньяс ывлаыс койö!

* * *

Зэрö век, оз ланьтлы лич.
Дзикöдз поводдяыс дзугсис.
Ваын вөр и ваын видз –
Некыдз гожöмыс оз пуксьы.

А ме зэрöмсьыд ог пов,
Ветла вöрса туйöд-вожöд,
Гашкö, көнкö, – вошöм лов, –
Меным паныдасяс гожöм.

Гашкö, туйсö потшис нюр,
Воис пикö, сёлöмшöрыд:
Петан ордымыс оз сюр
Гожöмыслы пемыд вöрысь.

А ме вöрад шöйтны чож!
Босьта сойбордйöдыс сийöс –
Мекöд сэсся оз нин вош
Паськыд нюрö, вутшгяс пиас.

Öтув ставсö вуджам ми
Вöрса туйöд, быгтьö вокгяс!
Кутчысьöмөн, ки на ки,
Чужан грездö сыкöд локтам.

Сиктса войтыр сэсся дыр
Бурөн казьтыласны тайöс:
Кыдзи коркö парма пыр
Сиктö гожöмсö ме вайи.

* * *

Шоньд зарниён ывлаыс тырас...
Кокни кымөрөн зарниас пыра.

Сэсся муыслён туруна мойдө
Уся вылісянь ичөтик войтөн.

Дзоридз кйдыслы шоньдөс сета –
Сэсся видз шөрас дзоридзён пета.

Да и көртася сөнөда иддзён
Кыддза распытшса дзоляник виддзө.

Мулысь эбөссө идз пырыс босьта,
Пытшкысь шогсө да висьёмсө косьта.

Сэсся видз весьтас кокныда лыба
Колип сылана кельыдлөз ыбас.

Бара төлөдзыс шудаён лола...
Төвсө төвья. А гожомнас – ола!

* * *

Гожся лун йывсьыс мый нин и шуны?
Мудзём каньпи моз вугралё луныс.

Мый нин висьтавны веж кыз пу йывсьыс?
Сылён веж пиын кодлыкё сьывсьё.

Сэні, вож вылас, ичөтик пемёс.
Оз и тыдав, а сыланыс – шемёс!

Бытьё гожёмыс вож вылас дзольгё...
Кысьё сыланыс кыздорса ёлькөд.

Гажа лун шөрө кыз дорас локсяс...
Майбыр луныс да, мыйысь и шогся?

Ичөт пемёслён сыланыс эзысь –
Мездас сёлёмёс жугыльлун везысь.

Майбыр муыс, и вёрыс, и ваыс!
Гожся сынёдас кизьөртём маыс...

Бытьё войтөдө вый гожся луныс...
Гожся лун йывсьыс мый сэсса шуны?

* * *

Ошкамөшка мегыр улын вөлөн
Пышйө гожом сиктьяс-грездьяс пөлөн.

Гажа луньяс, шоньд рытьяс нуө
Тури төвьянінө, ылі муө.

Виддзыс бара йөзтөм мөдлапөлас –
Шойччө йөзкөд турун пуктан көлуй.

Керка пельөс пыкө вугыр шатьөй...
Копыр тэныд, гожөмөй, да аттьө.

Аттьө – луныс шондіа на волө,
Югзьөдыштө менсьым өтка олөм.

Менам сьөлөм восьтан жугыль висьтө
Бөрья шоньд югөрьяссө кисьтө.

Сьөлөм пытшкө пырө сөстөм ёльөн,
Гожөм йывсьыс казтьылөмсө кольө –

Ас кодьыс жө югыд, шань да мича!
Сійө менө тулысөдзыс видзас...

ЖОВ ПУ

Кисьмём вотёса жов пуа ывлаё
Лым нин петавлө – сөмын бөр сывлө на...
Кынмысь жов пусё нылөс моз окышта,
Воём вотөссө гусьёник кокышта.

Сьёкыд гөрөдө вотөссө йитёма...
Жовсө курыдсьыс лёкөда-вида мөй?
Вотөс курыдсьыс ас динө матыста –
Өні олөмлөн сэтшөм и кадыс да...

Вөлі олөмөн юмовсө вөзйёма!
Важөн юмовсьыс сьөлөмөй дөзмөма...
Өні курыдыс сьөлөмлы лөсялө –
Быдсөн пытшкөсөй курыдсьыс пөсялө...

А грездö век кыскö – эг мездысь...
Кöть керкаöс вузалі грездысь.
И коли эг быттьöкö горттöг,
А сьöлöмöс лыбöдан бордтöг.

И öнi, кор татчаньö вола –
Сэк горт дiнö кежавны пола...
Оз, гашкö, и сибöдлы дорас,
Грек вöчöмсьыс ачымöс ёрас.

И лэбöны лунвылö арын
Юсь-дзодзöг...
А ме вуджи карö,
Да карас и вужйöдiс олöм...
А грезд... Грездöй мöдьяскöд олö.

Ме эмбурөн некор эг лыддысь,
Но вузалі гортöс – и быттьö
Лов гажöдысь нöрысыс кыри,
А сьöлöмлы öзыныс быри...

* * *

Ыпмунлі гөгөр – и куסי...
Шондіыс бытгыё эз вөв.
Гыясөн серөдіс юсө
Лым чирьяс гудралысь төв.

Сөніксьыс ывлаыс тэська...
Енэж он аддзывлы дон –
Бытгыёкө зэвтөма весьтө
Ас кыём дөраысь вон.

Оз кыскы кыз пуа нөрыс,
Некысь оз сюр гажаин.
Виддыс, и юыс, и вөрыс –
Быдтор мем дөзмөдө син.

Мустөм и керкаса чөвлун...
Личкөма сьөлөмөс мөвп:
Збыль мөй нө шудаён вөвлі?
Гашкө, и томнас эг вөв...

Весигтө йөз сьылөм горас
Сьыланён йитчыны дыш.
Шөйта да ывлалысь ёра
Ме водзын абутөм мыж.

Луннас зэрö. Войнас йизьö.
Поводдяыс – сьöкыд висьöм.
Сьöкыд висьöм кодь жö олöм:
Мый и сьöлөмйлы колö?

Ставсö видлі – ставсьыс уми:
Оз ков шома, оз ков юмов.
Мустөммисны вижыс, лөзыс,
Кодалысь да зыксъысь йөзыс.

Пышйывны кө!
Сьöd вөр шöрас
Сынöd коляозья көра!
Сэн оз гусясьны, оз юны,
Сэні лёк кыв тэд оз шуны.

Сэні, сэні!..
Сөмын сэтшөм
Мортлөн олан сямыс, этшыс:
Мича вöрыс корнас-лыснас,
Да öд бара татчö кыскас!

Тані серам эм и синва,
Овлö, чужөмбанад инмас...
Сөмын кыдзи ловтö кутан?
Бара йөзкөд лоа шуда.

Олышта, да сьöd вөр шөрö
Менö кыскö, сьöлөмшөрös...
Мый и корся, мый и колö?
Сьöкыд висьöм кодь жö олöм...

* * *

Кусём водзас кодзув
(Важён тайё вёлі)
Ёсь да лэчyd дзирднас
Дойдіс менсьым сьёлём.

Кляничаён сатшис,
Лёнь олёмёс дзугис,
Бытгьё дойнас тшөктіс:
«Өзйы, муса другё!

Куса, а тэ нэмад
Көть нин ме моз, дзирдён,
Арся пемыд пиас
Чуймёдана вирдышт.

И эн сотчы ковтөг –
Нёшта көсья сины!–
Туй көть өти ловлы
Инды югыдінас.

Тшөктёмёс кор вөчан
Тшапитчытөг, чёла,–
Сөмын сэки дойсьыс
Бурдас тэнад сьёлём!»

Тайё лоёмторсянь
Исковтісны вояс.
Ошйысьны ог вермы:
Сьёлём – век на доя...

* * *

Зэръяссы увтыртны арсö ог көсйы,
Кымөрö пыравтöг шондіыс öйй.

Эскыны мичаас, бурас ог дугды,
Мыйкө öд бара на олöмын югдас.

Гördön да кольквижөн пöртмасьö парма,
Муса на этшаник съöланас-тарнас...

Важиник пищальён ветлөдла вöрти,
Ачым ог тöд: лолöй радлө-ö? Бördö?

Ветлөдла вижөдöм нöрысьяс пöлөн,
Быттьökö жыннянö кучкалö съөлöм...

Мусаöй! Тэ йылысь казьтывсьö бара,
Волін тай олөмö шондіа арөн.

Шондіа ар мозыс волін дай мунін...
«Радейта», – сöмын и удиті шуны.

Сійён и эскысьсö: окалан мөдöс,
Но öд и ме йылысь съөлöмыд төдö!

Мунін – и мед... Меным уна на коли –
Пожöма нöрысьяс, расьяс да ёльяс.

Сетö на олöмыс дзoляник гажсö –
Парматі шöйтны да казьтывны важсö...

* * *

Ошинь улысь сямод дозйын пукта
Пызан вылө кисьмөм пельсь роз...
Мед көть сійө биён муртса югдас
Менам керка – өтка мужик поз...

Водз на быттё пöрысьлунысь повны,
Сöмын мыйкө жуглясьлывлө лов:
Тшöга... Дышма... Некод нин оз ков мем!
Да и ачым некодлы ог ков...

Но и öнi тшапитчыштны колö:
Эг на лэдзчысь, сьöлөмөн эг ляб!
...Ывла вылын, быттё менам олөм,
Уна рөмөн пöртмасьö сентябрь.

Бара сійөн нимкодясьны кута,
И ог лёкөн аддзы ассьым нэм:
Уна кө сэн пемыдыс да рудыс,
Зарниыс öд унакодь жö эм...

* * *

Лолын өнөдз на эз кув
Сиктса олысь:
Сьёлөм гажла арнас век
Гортө вола.

Төдса вөрө өдзөсыс
Эз на сиптысь:
Сьылі вылын төлысь чөж –
Сьөла чипсан.

Чипсаныскөд орччөн тшөтш
Эм и перна:
Ковтөг пуад ог на сөт
Лэчyd чернад.

Парма пытшсьыс сөстөм ёль
Ог на пежав!
Важ моз ставыс меным тан
Шань да вежа...

И көть ошкөд аддзысьла –
Ог на гатшась!
Карса мозыд ог на лый
Перк да катша.

Да и пёткаыс на жаль –
Сідз нин лыда!
Батьёс-мамёс вошйода
Сьёла шыднад...

Сідзкё, эм на сьёлёмын
Коми руыс!
Ог на янёд ачымён
Чужан муёс...



* * *

Көть нывбаба гожёмыс гөстя моз воліс,
Но век на со югыдсё виччысьё лолёй –

Мый шонділань нюжөдчас парма быд пуён,
Мый шусяс век Комиён ас чужан муёй,

Да юргас на йёз пөвстын ас коми гажыс,
Да олас на выльыскөд пөль-пөчө важыс.

Мед сёркни да картофель – асланым йёрса!
Мед вотчысьёс пармаас вильшалас Вёрса!

Мый кыптам да асьнымёс бырёмсьыс мездам –
И ловзяс на челядь гор важ коми грездас!

Мый некор оз быравлы няньным да совным...
Мый комияс кутасны ас нырнас овны!

РУБИНА

Шулі чорыда: сьёлём оз сыв,
Оз кө аддзысь веж юрсиа ныв,
Кодлөн синьясыс – тувсовья енэж!
...Олём сетіс, сьёд синмаой, тэнö.

Төдтөм вын тэнад синьясад эм:
Быттьö сөнъясö кисьтöны мем
Арся шондiөн сорлалём вина,
Кодыр видзөдлан вылө, Рубина.

Менам нэмö кө локтін – и ов!
Тэнад синьясö вöйны ог пов,
Көть сэн пемыдыс – арся сьöd войлөн,
Кор тай көдзыд зэр енэжыс койлө.

И көть сьыланöй сідзи нин нор –
Вөчөм дойяссьыс тэнö ог ёр!
Мекөд сёрнитан – быттьөкө мойдан,
Но он бурдөд, а ёнджыка дойдан.

Медья! Нэм чөж – и öні, и сэк
Меным мусаджык вöліны век:
Сьёлём кып дорысь – лөнъ сьёлём дойыс,
Югыд лун дорысь – сьöd арся войыс...

* * *

Кор ывла вывсö ыркöдыштас арыс –
Ну менö сиктö, турунвиж «Икарус».

Сэн, быттö понпи, вильыш төвру дурö!
Мед карса буссьыс пальöдыштас юрöс.

Мед төлöдас лов пытшкысь висьöм-шогсö
Да коляс сöмын мича олан могсö.

Мед югид расын йөлöгаыс нерас,
А луныс лоö тшака шоныд зэра.

А рытнас весьтын воссяс енвевт лöзыс!
Мед нюмъялöны меным сиктса йöзыс.

Кöть карыс чайттöг лои меным гортөн –
Мед оз на шуны менö локтöм мортөн.

Ме карса олём гажтöмөн ог лыдды,
Но сиктöс сийö сёлöмлысь оз мырдды.

* * *

Уна шог на менö
Сулас таладорас.
Унаысь на рöкыс
Быдсяма ног ёрас.

Унаысь на ёртъяс
Пөръявласны менö.
Унаысь на ковмас
Пыравлыны венö.

Унаысь на аньяс
Дойдаласны лолöс.
Уна сьöкыдлун на
Ваяс меным олöм.

Но, а мöдарьюгид
Гажа пö да мича.
Сэн пö тэнсьыд ловтö
Енмыс ставсьыс видзас.

Мед! Ме таладорас
Немторйысь ог дзебсьы!
Сöмын таладорсьыс,
Лолöй, эн на лэбзьы!

Тöждьясысь ог мездлун –
Мöдтор Енлысь кора:
Медым дырджык сетіс
Овны таладорас.

* * *

Кор лымйыс төдса видзьяс вылас водас –
Сэк оланногын кыпыдлуныс содас.

Сэк чань моз съөлөм мынас шоглун йөрсьыс
Да тпкан өдсө содтас ывла көрсьыс.

Дерт, бара кутас лун югыдыс чинны,
Но шойччыштас көть еджыд вылас синмөй.

Октябрлөн черань вез кодь помтөм зэрсьыс,
Сёр арлөн букыш съода-руда серсьыс.

...Став лёкыс кольö тайö съодас-рудас,
Кор төлыс арсö эшкынавны кутас.

* * *

Войыс енвевт шөрө кольквиж табсө чөвтис,
Кадыс меным войсө пельпом вылө сөвтис.

Быттё сытөг этша вылын кыска-нуа,
Быттё сідзи-й ола: гажөдча да юа.

Тöлысь табыс югьд. Кодзув дзирдыс тшөкьд.
Лымьяс коскөдз вöйла – сэтшөм войыс сьöкьд.

Лолöй важөн тыри. Асылыс оз лок ни!
Да көть сэсся локтас – лоö өмöй кокни?

Асывсö сэк ковмас вой пыддиыс нуны,
Асыв бöрын вичмас пельпомöйлы луныс.

Мунан туйöй – помтöм. Енвевт йирыс – джуджьд.
Нэм чөж таdzi тырмас пельпомöйлы уджыс...

* * *

Во помын войясыс чөлөсь да кузьось –
Ывлаыс узьө. И сьөлөмөй узьө.

Пемыдыс пемыдсө, вой войсө ордйө
Му весьтас шевкнитчөм кодзулөсь бордйөн.

Войясыс кузьось. Кывтöны чöла.
Ывлаыс тыртөм. Пода ни вöла.

Ывлаыс тыртөм. И сьөлөмөй тыртөм.
Төв сэтчө лымсө да көдзыдсө пыртө...

* * *

Ю весьтын потан кодъ гатшасьом тӧлысь,
Кагатӧ водтӧд да сыв сылы «ӧввӧ»...
Ю дорын узьоны, рамось да чӧлӧсь,
Гыӧра бадь кустьяс, быттьӧкӧ вӧвьяс.

Пӧчӧлӧн мойдысь дзор бурься вӧвьяс...
Асывнас ньӧжйӧник на дорӧ пета,
Медым эз повзыны кок шыысь... Ньӧв моз
Ю сайӧ медым эз тӧвзыны метӧг.

Ӧтнам эг коль медым ю таладорас,
Медым ён вӧвьяскӧд писькӧдӧ русӧ!
Ю сайыс мыйлакӧ пыр менӧ корӧ,
Медбӧрья кодзув кор ю весьтас кусӧ...

Вӧр сайсянь шондӧ кор гӧрдӧдӧм бансӧ
Мыччӧ – сэк мыйлакӧ лӧнь сьӧлӧм дойӧн
Казьтывсьӧ меным роч важся романсысь:
«Утро туманное, утро седое...»

* * *

Кусі төвся төлысь сиськыс –
Шонді сывдём зарни кисьтö
Парма шөрö, муяс вылö,
Лымйыс пемдö, пуксьö, сылö...

Кисьтö карö, кисьтö грездö,
Төвся зумышлунсьыс мездö
Репас бериньяса рассö,
Зарниалö пожöмьяссö.

Шогсö-лөксö вильыш горөн
Нуö-вöтлö зарни шорөн,
Ловьяс небзьöдö да шонтö...
Гашкö, мөд ног овны пондам?

Сывдём зарни кывтö-кывтö...
Гашкö, сьөлөмьясысь сывдас
Ыджыдалысь скөр да зумыш,
Поздыяс сэн тувсов нюмыс...

* * *

Тулыс төвсө пөрөдс,
Но эз дыр ов тан.
Локтис мир туй шөрөдыс
Гожом, шондiban.

Здук – и туйсьыс вошөма,
Зэр оз ланьтлы, яр:
Муса вөлі гожөмыс –
Сөмын воис ар.

Воыс уна төрөдө –
Бара пуксис төв.
Зэра арсө төлөдс,
Вайис еджыд чөв.

Коркө лымйыс сывлас да,
Быгзяс льөм пу роз.
Помся вежсьө ывлаыс,
Менам олөм – оз.

Мыйкө нэмын збыльмас-ө?
Дойсьыс потө юр.
Мый мем тайө выль осьыс?
Важыс вөлі бур...

* * *

Асья пемыдыс рыгъясö судзö,
Тайö пемыдсьыс дöзман и мудзан.

Мудзан сэтчöдз – оз эскыссьы бурас,
Чайтсьö: олöмыс бара на пурас.

Чайтсьö: тэнö и кыйöдö лёкыс!
Нэмад сы мында тöждыс да нокыс.

Сийö-й тулыссö виччысьны мöдан –
Водзвыв кыпöдан асьтö, кöть тöдан,

Мый и тулыслöн эскöдöмын
Этша збыльторйыс: пöрьялас сöмын...

Да кöть лёксö сэк виччысьны дугдан,
Кодыр казялан: водзджык нин югдö...

ЛЫА ДІ ВЫЛЫН

1

Чөвлы! Немторйысь менө эн мыжав,
Пуксыы өдйөджык пелькиник пыжас...

Важөн ю дорас виччысьö сійö!
Босьта кокныдик пелысьяс киö.

А тэ бөжавны, чайта ме, кужан...
Лыа ді вылас йөз дінсьыс вуджам.

Мусö эновтам бушковнас-грөзнас,
Шогнас, миянөс дивитысь йөзнас.

Дзесбям-саймовтчам шумысь да зыкысь,
Лыа ді вылас овмөдчам кыкөн.

Лун и вой кута радейтны тэнö –
Оз нин суклявны миянөс сэнi.

Лёксö вунөдам, ловъясөн вильмам!
Гашкө, ставыс на олөмын збыльмас.

Кык шонді

Төвру ворсөдчө валъялысь гыкөд...
Тэкөд ді вылас гожйөдчам кыкөн.

Дыр на шонділы енэжас кайны...
Динө топөдчы доналөм яйнад!

Татшөм шудсө ме дыр нин эг төдлы –
Важсө казгыла омөлик вөт моз!

Олі өтнамөн, майшаси-кынми,
Эг нин чайт татшөм олөмысь мынны.

А со бара на югзьөдін нэмөс
Зарни юрсинад. Вөт али вемөс?

Вемөс! Дінысь ме лов шытө кыла –
Сійө колиплөн дзользьөмысь мыла.

И, сө майбырөс, шонтөны менө
Гожся шонділөн жарыс, и тэнад...

*«Сьёлөмөй бөрдө и сьылө,
Виралө – быдсяма ног...»*

Тима Вень.

Лэбөма рытыс – эг төдлөй...
Вой рытсө ді вывсьыс вөтлө.

Пемыдыс, кельыдлөз рөма,
Енвевтсө төлысьнас дөмө.

Мусалөн, небыд жө сойыд!
Шоньд да лөнь гожся войыс...

Весьшөрө зыньгөны номьяс –
Туй налы тупкөма вонйө.

Узьөны ю сайын козьяс...
Шуан – вай өтутвам позьяс?

Энлы! И войыс на пемдас!
Мекөд тэ майшасян нэмтө.

Ыркөдас ывласө бара
Ёртөй – шог синьяса арыс.

Мыйсө на олөмыс ваяс!
Муслуныд – ада и рая...

Кодарас кежөдас-сюяс?
Визулөсь олөмлөн юяс!

Унатор водзысьыс кылө –
Сьёлөмөй бөрдө и сьылө...

Ді сайсьыс, оз нин и ылысь,
Арыслөн кок шыыс кылö.

Войяснас бара нин пемыд...
Дженьыдик гожöмлөн нэмыс.

Мед! Сійö бара на волас!
Мöдторйысь майшасьö лолöй:

Эз-ö нин ыркавны понды
Ми костын ыпмунлём шондi?

«Мусаöй!..», «Донаöй!..», «Шаньöй!»—
Тадз тэнö ыдждöдла, аньöй.

Бытьöкö пöвторыяс помся
Шыблала биö, мед ломзяс...

Ловьясын бипур кодь муслун
Ёнджыка ыпмунö? Кусö?

Енвевтыс өшйöма, букыш –
 Дінымöс муртса оз люкышт...

Зэрьясысь тупкыны корö
 Коньöр моз йöжгыльтчöм зорöд.

Төвруяс абу нин чожöсь!
 Воштіс веж рöмьяссö гожöм.

Гожöмöй! Тэзысь на уна
 Вошті ме кымöра луннас.

Вöзйылö съöдöдöм лолöй:
 Быть öмöй овнысö колö?

Вадорыс тыртöммис бара...
 Тэнö ме весьшөрö, арöй,

Ёртöс моз, пуктылі пыдди –
 Локтін да мусаöс мырддин...

* * *

Муслун йылысь гиж
Арся гөрдас-вижас.
Арся көдзыд руас,
Енэжас и муас.

Гиж сэсся төлын
Едждөм мөдлапөлас,
Зумыш козья вөрас,
Ыргөн төлысь шөрас.

Югид тувсов лунө
Гиж уна-уна
Рөмпөштанас-тыас,
Лэбач дзользьөм шыас.

Гиж гожся войө
Сьөлөм гажөн-дойөн...
Сэсся арся вижас,
Воас кад да, гиж.

Гиж – быттьө бөрда
Рыгтя кыа гөрдас...
Гиж – быттьө сыла...
Кор тэ менө кылан?

* * *

Ыджыдало ывлаас тувсов олан лад...
Лөзовьюгид рытьясой, бара тиян кад.

Ыджыдало тулысыс... Дырджык мед оз мун!
Ыджыдалан сёлөмын тэ, лөз синма тун.

Лөзовьюгид рытьясө лэчкө шедіс лов.
Лэчкө шедіс лолөй да – мездлуныс оз ков.

Коді өнөдз лэчкавтөм – медым петас веж!
Лөзовьюгид рытьясысь некытчө ог кеж.

Лөзовьюгид рытьяссө некодлы ог сет –
Тувсов ывла мичлунсө видза сөмын тэд.

Гашкө, тайө рытьясысь, – мөвпавлывла сідз, –
Коли тэнад синьясө лөзовьюгид мич.

* * *

Мартнас, кор ывлаыс югдö,—
Югдö и кыпавлö лов...
Кодкö кö пыдди пунктö —
Он на весьшөрö ов.

Тулысыд могъясөн волас —
Сосъястö сöмын пудж!
Он на дзик весьшөрö лолав,
Эм на кö кийдлы удж.

Кыаён ыпъялас асыв...
Луныс оз тыртöмөн лок,
Рытсыньыс тöждөн кö паса,
Видзан кö сёлöмад мог.

Морт, кутшöм кад кöть эз волы,
Тöждьяснас югзёдö нэм...
Сылён, код талуннас олö,—
Талуныс сöмын и эм.

Эз нюмунлы төлысьнас, съод вөлі войыс,
А сэсса и асылыс букышөн воис.

И зумыша-зумыша мөдөдчис луныс...
Сьод зэр кутис му весьтас өддзыны-туны.

Со корьясьтөм рас тайө зэр улас йизьө...
А менам быд кыз вөсна сьөлөмөй висьө.

Ме ставсө на аддза тась радейтысь синмөн,
Тан ставыс на аслам, да быдтор на инмө –

Мый грездяслы важөн нин пуктысьны колө,
А ывла оз лэдз, аслас олөмөн олө...

Мый йөзыслөн олөмыс сьөкыд и доя –
Руд кымөра луна да төлысьтөм воя...

И кытөнкө сийөссьыс петан туй эм-ө?
Ёсь көрт тувйөн майшасьөм сатшө юр вемө...

А гашкө, ас йөз дінысь сийөн эг ылав,
Мый дой пырыс сьөлөмөн олөмсө кыла?

И сийөн на веськодьлун лолөс эз пужьяв,
Мый ас чужан муөйкөд өтувья вужья...

ВОЛІ СИКТӨ...

Ме карас овмөдчи нин кор –
Да сиктлы өмөй кола?
Ни аслам му, ни керкатор –
А век тай мыйкө вола.

Выль олөм сиктөй оз нин пан,
Дась лежнөг-өгөн тырны.
И овлө: лунтыр ветла тан –
Да некод динө пырны.

Том йөзсьыс некодөс ог төд,
И коді кодлөн – сорся...
И абу тані ёрт ни рөд –
Да мый татысь и корся?

Но ог кө волы сиктө дыр –
Сэк ола өмөй шогтөг?
Сэк унмөй майшасьөмөн тыр,
Сикт ачыс вөтө локтө.

Өд ловья морт ме, шондібан,
Да олөм дінас писка:
И лов, и сьөлөм менам тан –
А карас – куш прописка...

...КАРЫН

Бара көдзид. Шондөдны оз тэрмась,
Шонді дзирдөн оз на чуймөд лун.
Некыз ывла шондөдны оз вермы,
Некыз татысь көдзыдыс оз мун.

Лючки тулыс эз на кежав татчө,
Парк дорышсө ытваө эз сюй...
Тöлыс некыз мунан туй оз аддзы,
Тулысыс эз аддзы локтан туй.

Войнас муртса ланьтлас чорыд төлыс –
Асыв бара вайө лымья грөз...
Зумыш карөд ветлөдлөны чөла
Поводдяыс кодь жө зумыш йөз.

Дыр на ывла турөбалас-дурас,
Дыр на войтыр долыдөн оз ло.
Мый нин лысьтан эскынысө бурас,
Кодыр некыз шоныдыс оз во...

* * *

Оз нин ков – да шляча петіс бара,
Тулыс быттьö бергöдчыліс арас.

Оз нин ков – да казътылöмыс волас,
Сьöлöм вылö быттьö пуктас тола...

Эндöді öд, воштi рöдлысь могсö –
Пöль-пöчлысь, мам-батьлысь оланногсö.

Пöльлөн чös туй важөн эндіс-тыри –
Сьöла-дозмөр егыръясысь быри.

Чині, чині чужанінлөн мичыс!
Понöлясис батьөн вöчлöм виддзыс –

Кунис турун-дзоридзьяса синсö!..
Ог нин аддзы мамлысь вотчанінсö.

Лайкмунома ыджыд мамлөн гуыс...
Кыдзи öнöдз кутö менö муыс?

* * *

Садьми водз да муні мусö-васö –
Вои шонді биён ойдём расö.

Ывлаыслысь мелілунсö кыліс –
Асывчöжыс колип сэні сыліс.

Кöсйис менö гажöдны – да дойдіс!
Курыд дойөн сьölөм пытшкөй ойдіс.

Сыланкывнас майшöдліс юр вемöс:
Гöльмөді öд ачым ассым нэмöс...

Вөлі том – да расас шоча волі,
Тулыснас кор нимкодясьны коліс.

Лун-вой ковтөм нокъяс вылө лоті –
Колип сылан кадсö ассым соті.

Коли томлун колип сыланкывтөг!
Югыд дойтөг, шудтөг, муса нывтөг.

Öні сійö кадас туйыс таса!
...Öтнамөн и шöйта тувсов расас...

...Колип сыланкывйөн расыс туис –
Бөрья гажсö сьölөм пытшкысь нуис...

* * *

Олөмыд – олөм. И зумыш, и шань –
Бытьёкө руа да асныра ань.

Здукъясөн – лун төв кодь мелі да бур:
Нюммунлас. Небыда малыштас юр.

Олөмыд – олөм. Зэв дыр олас чөв,
Сэсся и витас морт сьөлөмө ньөв.

Сьөлөмтө виччысьтөг жугөдас – пась!
Вөчалас гөрөдьяс – нэм чөжыд разь.

Дойдлас – да коркө и бурасяс бөр,
Өвтыштас сынөдас веж дзоридз көр.

Ловнас сэк бара на кыпавлас морт...
Олөмыд – изки... И олөмыд – борд!

* * *

Асьявылыс пышйис войся чöлыс,
Зарниасис козья мöдлапöлыс.

Лэбач сыланкывйöн ывла ловзис –
Медым мортлы сьöлöмсяньыс овсис.

Ывла вылыс югөрьясөн тыри –
Лунас шондi вичкоö моз пырис...

Енэж шөрсянь лунтыр сэсся ёрсис –
Медым мортлы сьöлöмсяньыс овсис.

Коркö-й сэсся ваймыштöм нин шондi
Парма-вөрлань катовтчыны пондiс...

Лунся жарыс рытя лöньсьыс повзис –
Медым мортлы сьöлöмсяньыс овсис...

Локтiс вой да рытлы тшöктiс мунны,
Мортлы – шоньд эшкын улö сунны...

Чöскыд унмөн мудзсö вöтлiс ловсьыс –
Медым мортлы сьöлöмсяньыс овсис...

ШУДА КАДӦ

1

Енэж кымӧр лапнас шонді синсӧ
Пӧдлаліс – и вежсис ывла сер.
Шобис нӧрысйывса козьяинсӧ,
Югыд рассӧ шоныд кинас зэр.

Шобис – сӧмын немтор сэсь эз гусяв,
Мичмӧдіс на козья-кыддза яг:
Петіс шоныд зэрнас шонтӧм мусьыс
Быд пу улӧ зумыд кока тшак.

А ме вӧрад ветлӧмысь ог дӧзмы,
Сиктын быдмӧм, асывнад ог узь:
Петӧма нин гортись югыд лӧзнас,
Медым шӧйтан кадыс вӧлі кузь.

Гобыс вӧрас, расас, муяс пӧлӧн!
Майбыр, воштан копырыдлысь лыд...
Тӧвнас сэсся долыдмӧдас сьӧлӧм
Арся парма кӧрнас тшака шыд...

Виччысьö вотчысьöс вöрыс –
 Егыр и ягсера рас!
 Август! Тэ съöd сэтöр көра –
 Воыслөн медшуда пас.

Водзджык көть пемдыны пондіс,
 Асылыс ыркыд и сөдз,
 Гоҗся на, мелі на шонді,
 Визулөсь бобув и лөдз.

Вежөн на пармаыс ойдө,
 Оз на скөр пужъясысь пов...
 Съөлөмлы лун төлыс мойдө,
 Выялө-небзьөдө лов.

Отпускын вунөдла ставсө,
 Пармаас – ог на өд вош!
 Муслун моз виччыся август,
 Мудз төдтөм овла и чоҗ.

Атьё, мый гоҗөмөн волан,
 Атьё, мый августыс эм –
 Сөмын нин таысь тэд, олөм,
 Уджйөзөс мынтыны нэм...

Мый кольома – он бергөд...
 И арлыд йылысь – чөв!
 Мед бара панө зэркөд
 Лөнһ сёрни вильыш төв.

Көть шондї – арлань келысь,
 Но муса ывла рөм –
 И воём розья пелысь,
 И вотос кисьтысь льөм.

Ме ставсө пукта пыдди,
 Дзик ставыс моздө мем:
 Мый олөма – он мырдды,
 Мый вөлі – сійө-й эм.

Мый вөлі – сійөн озыр...
 И быдтор меным ас –
 Мед пелысь воём рознас
 Мем пытшкө вөчө пас.

Видз, чужан муөй, асьтө!
 Ну лёксө, вильыш төв,
 Да бурсө меным казьтыв,
 Но арлыд йылысь – чөв!..

* * *

Энлы дойдны менö, энлы!
Быд лун гусьöн кевма Енлы:
Ог кор этша, ог кор уна –
Мед эз энöвт лышкыдлуннас.

Мый и колö нэмöс вуджиг?
Медым нэмö тырмис уджыс,
Удж мед вöлі няня-сола...
Да мед чужанінлы кола!

Медым аскисьыс не повны!
Медым радейтöмön овны –
Аньяс нюмъявлісны воча,
Да мед пöръявлісны шоча.

Медым висьöм эз на нюкырт,
Медым пöрысьлун эз чукурт!..
Шогтö-лөктö оз ков корны,
Енмыд аддзас, мыйысь ёрны...

* * *

Тайё өмөй олөм?
Асывсяньыс колө
Могөн гортсыыд мунны,
Төждьяс пиё сунны.

Тайё өмөй олөм?
Радейтчөмыд волө
Ёнджыкасө дойөн,
Дойсьыс узьтөм войөн.

Тайё өмөй олөм?
Сөмын көсьян «чолөм»
Таладорлы шуны –
Бөр нин колө мунны.

Тайё өмөй олөм?
...Кустөм енвевт лөзөн,
Ваён, муён, йөзөн,
Сурөн, няньён-солөн –
Майбыр жө нин олөм!

* * *

Регыд пельсы ӱзтас еджыд тугъяс...
Кымынысь нин сюрлі олӱм дзугъяс!

Но эг велав видзчысьны да повны,
Мудерасьны, йӱзысь сюся овны.

Эмбур ноптӱг олӱмӱдыс муна –
Сытӱг меным нимкодъторйыс уна.

Рытъявылыс пельсы дорас кежа –
Пельсы улас вода турун вежас.

Уна мӱвпкӱд гажаяс тшӱтш волас:
Жугыля да лӱка ӱмӱй ола?

Кыськӱ ылысь шудӱс эг кӱ корсь ме –
Сыысь немтор олӱмын эг ворссы.

Да и кӱнкӱ сійӱ шудыс эм-ӱ?
Гашкӱ, медся коланаыс нӱмад –

Юкмӱс ва моз рытъя сынӱд юны,
Нимкодьясьны тайӱ пельсы пунас,

Нимкодьясьны раснас, видзнас, юнас –
Енӱжнас да югыд тувсов мунас...

ПЫШКАЙ

Майбыр, пышкай төвйөма, кыз пу вылын йөктө,
Гозйөдчыны-быдтысьны тулыс сылы тшөктө.

И көть тувсов гажөн нин өні ола-выла –
Пышкайыслы ачымөс уджйөзаён кыла.

Төвнас, висян здукъясө, эштыны кор поли –
Гашкө, тайөс кылөмөн, өшинь дорө воліс.

Быттьө аснас петкөдліс, шуліс быттьө: со пө –
Төвйынысө тэ дорысь сьökыд меным сө пөв.

Тшыгъяла да кынмала. Тола вылын тола.
Но ог сетчы төлыслы: мырся-лэба-ола.

Олөмыс пө тулыснас бара лоө шаньөн!
Ышөдөмсьыс пышкайсө чөсмөдливлі няньөн.

Гашкө, сытөг, пышкайтөг, сап пемыдас пөді!
Ловья ловьяс, ышөдім, пыким өта-мөдөс.

ШУДА ВӨТ

Көть юыс неуна и гыа,
Но гожом – быттьо мелі ань...
И кыркөтш улас зарни лыа –
Сы вылын гожйөдчыны шань.
И гожся енвевт лөзыс помтөм,
И личкө вадор бадьсө ун...
А шонді асьсө меным ломтө
Да вый моз сывдө гожся лун.
Сэк тайө здукьяснас и олі
И эг на артав вояс лыд.
А гортө муртса узьны волі,
Кор войө вуджліс шоныд рыт.
И өйис вой шөрөдзыс кыа...
И эски – виччыясны пыр
Лөз дзирда ю и зарни лыа,
А нэмысь долыдлун оз быр.
Но кисьтіс вадор баддыс корсө,
А сэсся вежсис олан лад,
Кор пунктис сьөлөм вылө норсө
Зэв уна төжда верстьө кад.
Тэ, вежөр, казьтылөмсьыд чөвлы!
Ме збыльсө ачым нин ог төд,
И чайтсьө – немтор эз и вөвлы,
А коркө усьліс шуда вөт...

Кадыс лөсьыд!
Кадыс сөстөм – асья...
Садьмөмаёсь вадорбердса расьяс.

Расас, тулыс медводз воё кытчө,
Гижта-пасья нимөс югыд кыддзө.

Зараванас бөрдыштас да бурдас!
Увьяс вылас шонді дзирдсө куртас...

Тувсов лунө коля нимөс расас:
Өти кыдз пу лоө сэні паса.

Томиник – да дыр на быдмас-туас:
Менсьым нимөс шонділаньыс нуас.

Коркө пыра муас – нимөй лыбас
Кыдз пуыскөд вежа енвевт ыбас –

Тури-дзодзөг ордымланьё, вылө!
Кыдз пуыскөд кывзас лэбач сьылөм...

ТӨВСЯ МОЙДЪЯС

1

Ньөжйөнникөн, гусьөн
Чині шонді пым.
Көдздөдіс – и уси,
Вевттис мусө лым.

Лунсө пөртис войө
Еджыд пася тун.
Полысьёс и збойёс –
Ставсө босьтө ун.

Воис тшөгөм ошлы
Гуө пыран кад.
Рөмпөштансө воштіс
Сөнікасьөм вад.

Сөнікасис енэж,
Зумыш лои кар.
Бара кыскө менө
Гыөралөм парк.

Шөйта сәті чөла,
Ловлы корся мезд...
Көнкө мөдлапөлас
Шогсьө чужан грезд.

Гашкө, эз на вунөд...
Дыр нин сэн эг вөв!
Пемдө лунысь лунө.
Бара пуксьö төв...

2

Төлыся войö

*«Öшинь весьтын төлысь,
Öшинь улын төвру».*

С.Есенин.

Петöма, майбырöй, кодзула йöрас,
Нюмъялö төлысьыс съод енвевт шöрас.

Эзысьтö му вывсö – шöрсö и дорсö!
Вой шöрнас петан да – ывлаыс ворсö...

Öтнамлы мем төлысь нюмыс оз лöсяв...
Збыль мöй и ме коркö радейтлi пöся?

Збыль мöй и ме шуда здукъяссö тöдлi –
Ышмылiс лолöй и сёлöмöй пöтлiс?

Вöлi – и төлөдiс томдырся гажсö...
Мыйла и төлысьыс садьмөдö важсö?

Мыйла и төвъяснас му весьтас волö,
Ун менсьым мырддьö да сөктөдö олөм?

Оз мöй нö төд: сё пөв майшөдлö дойөн
Пасьмунөм сёлөмöй төлыся войö...

Лун югыдсö пемыдыс венö,
 И ывлаыс шогсö оз дзеб...
 И муыс моз йизьöма енэж,
 А шондiыс дзузган кодь жеб.

И вой төвлы ризьявны вöля,
 А му весьтас лөвтыштлö кор –
 Сэк быттьökö шыасьлö пöлян
 Да ывлалы содтыштö нор.

И лым чирьяс ворсöны кöлысь...
 А ывлаас еджыдыс – чöv!
 Дзик быттьökö потöма тöлысь
 Да му пасьта кисьтöма йöv.

И тырисны пармаын туйяс,
 И гыөрзис коз пулөн тош,
 Но войöдз кöть егыртi уяв –
 Дзик некытчö öнi он вош,

Öд пармасö онишыс босьтö –
 И Вöрсалы вильшасьны дыш...
 А кöдзыдыс öтарö ёсьтö
 Да бан бокад видлывлö гыж...

Юрийов кодзув*

Төв еджыд кань кодь кыз пу соддзын,
 Му вылын куйлө байдөг гөн.
 Но öзйö весьтын Юрийов кодзув
 Да мейн вөрзёдö быд сөн,

Да чуткө буретш сёлөм шөрö –
 И таысь сёлөмöйлы бур!
 А төлысь кöдзыдысла дзөрö
 Да кымөр чирö дзебö юр.

Мед усялöны кодзув-войтъяс,
 Но тайö кодзулыс – оз усь!
 Ме öтнам шöйтa төвся мойдас –
 И медым мойдыс лоö кузь!

И эска – кута овны водзö,
 И ставыс мойвиас на мем!
 Öд весьтын öзйысь Юрийов кодзув –
 Медшуда кодзулыс и эм!

* Юрийов кодзув – Полярной звезда.

СИКТСА БИЯС

Е. Козловы.

Ю дорын, челядьпосни, быдён
Кузь лунтыр гажөдчамö ми...
Но коркө луныс вежяс рытөн,
И Калин Васька сетас би.

Ок, ог мөй өдйö гортö ризөд,
Öд мышку сайын – чикыш борд!
...Сикт пасьта куим телевизор,
И миян – ичөтик «Рекорд».

И төрлісны тай керка пиам
Суседьяс – олöма и том,
Кор петкөдлісны «Сиктса бияс»
Да «Макар Васька – сиктса зон».

Сэк вöлі гаж, и уджыс вöлі,
И некод аскисьыс эз пов.
Ар воліс арөн. Тöлыс – тöлөн.
А унджык миянлы эз ков.

И сійөн ме эг лолы жебөн
Да өнөдз кок йылысь эг пөр,
Мый рудзөг няньысь босьті эбөс,
Öд сыын – чужан мулөн көр.

И олөм рытө, рөмыд пиас –
Көть кузь, көть дженьыд лоө нэм,
Век пөртмасысны сиктса бияс
Да туйөс югзьөдасны мем...



* * *

Рассö зарни пöткаöс моз куштö
Кöдзыд зэра арся чизыр тöв.
Арся ывла пемыдлуныс шуштöм,
Пемыдлуныс жугыль мөвпьяс чужтö:
Вöли вöт, а гожöмыс эз вöv.

Рыгланыс, кор лöняс, ывла мöдас
Енвевтсяныс кисьтны кöдзыд чöv.
Öтнам шöйта – öтнамön и тöда,
Öтнамön и тöдöмлунас пöда:
Вöли вöт, а радейтöм эз вöv.

Зорödьяснас виддзыс мöдлапöлын
Казьтылас мем: шондi югзис пым...
Радейтöм и гожöм – ставыс вöли...
Казьтылөмөс нуас чизыр тöлыс,
Сэсся видзсö дзебас джуджыд лым.

* * *

Жугыль арся лунö
Тöдса расö муна,
Арлөн пыжөн кывта
Усьём коръяс вывті...

Жугыль мөвпъяс печка,
Сьөлөм быттьö лэчкын...
Регыд, регыд бара
Мунас татысь арыс.

Чужан муёй! Парма!
Вонас öтчыд – арнас
Мичлунныд тадз ёся
Тиян меным вощьö.

Но и арся мичыс
Сьөлөмөс оз личөд:
Вой төв локтас лымйөн –
Ставыс кусö-кынмө...

Öти кöдзыд асыв
Кынтас мусö-васö...
Менам жугыль лача –
Гашкө, куса ачым...

Сійөн нöшта öтчыд
Лолала ме пöттöдз
Вадорын да вöрын
Чужан мулөн көрөн...

КОДИ МЫЖА

Лунтыр зэр да шляча –
Рытөдзыс оз коб...
Өтнам нуа ачым
Ассьым олан ноп.

Нока... Вөча... Кера...
Быдтор быттьö эм.
Сöмын пырдзык зэра,
Букыш менам нэм.

А кор вой төв швичкө,
Шляча усьö кор –
Дас пөв нопйöй личкө,
Дас пөв меным нор.

Зэрö и оз öвсьы,
Ойдö ласта-көдж...
Ставсьыс – зэрсьыс, төвсьыс,
Көдзыд арсьыс тшötш,

Мый со öнөдз сьөлөм
Некодкөд эг йит –
Мыжа ачым... Чөлöй!–
Некодöс ог вид...

ЫДЖЫД ЛУН

Талун шонді кымөрө оз сун!
Бовгө вичко жынняя – Ыджыд лун.

Оз позь талун шогсьынысө, оз –
Ловзьёма йөз шуд вылө Христос.

Тувсов енэж кыпид, сөстөм лөз!
Тувсов кыпид сьөлөмаөсь йөз.

Тувсов ывла – дзоридзалысь куд!
Некод вылө некод лёк оз кут.

Ловьяснымөс йитө зарни пос –
Ловзьёма йөз шуд вылө Христос!

Еджыд кымöрсö льöм пуыс вожъяснас тывйыштіс,
Ася кыаыс енвевтсö вөр весьтас сывйыштіс.
Лэбач сыланөн вөр-ваыс пасьтанас шыалö,
Уна көсйöмөн вежөрöй важся моз гыалö.

Гожём расъяссö турунвиж дөрöмö кышöдö,
Менö шогъясысь мездö да овнысö ышöдö.
Лолöс бурдöда гыалысь ю дорас волöмөн,
Бара сёлöмöс бурмöда шондіа олöмөн.

И мед оз нин мем вильыша нюмъявны нывъясыс,
Налы мөдъяслөн, томъяслөн, восьсаөсь сывъясыс,
Бара сёлöмöй бордьясьö кодздöдысь көръясысь,
Бара ас дорас корöны дзоридза йөръясыс.

Югыд шондіас, төвруас, лэбач шы-дзольгöмас,
Расас, льöм пуас, видзьясас, садьмём шор сёльгöмас
Зумыш мөвпьясысь тулыснас сөмын и ылавла,
Гожся төврунас быттьö бөр томлуно кылавла.

* * *

...Кор тулысыс ар кодь шуштём,
Кор бордьясыны раслы оз сет –
Мед вой тóлыс нюжйöдлö чушсö,
Мед му весьтас бöрдывлö, мед!

Сэк шаньöсь мем овлöны рытьяс,
Важ керкаын ломтысьсысь пач...
Сэк пемыдыс воливлö шытöг
Да гусьöник – муса моз нач.

И мөвпавсьö войбыд, и гижсьö...
А ывлаас петала кор –
Сэк тóлысьлөн гөвкъялысь вижсьыс
И меным тшöтш лöсьыд, и нор...

И кыскылö ас дiнас енэж...
А сьöлөмөс бордьялысь шог
Став му весьтас кыпöдлö менö
Да баййöдлö быдсяма ног,

И дойдö, и эскöдём сетö,
Мый весьшөрö пытшкын оз ов,
А югыда гижöдын петас
Да кодлыськö вöрзёдас лов...

МАЙ ШӨРЫН

Кизьөркодь на турунвижыс расас,
Джөмдывтөг на пырыс ветлө төв...
Кокъяс улад пемыд на и васөд,
Весиг луннас ыркыд на и чөв.

Но өд шонді весьшөрө оз ёрсыы:
Өні на – эг төлысь сайын, эг!–
Шуда вөлі шоръяс бузгөм горсьыс,
Заравасө пөттөдз юлі сэк.

Бузгисны дай ланьталісны шоръяс...
Регыд – оз мөй өдйө кадыс лэб!–
Бара ваяс лун төв садьмөм борйысь
Сиктө гожся «козин» – ном да геб...

Вадор пөлөн вежөдасны лудьяс
И – оз нюжав тулысылөн нэм!–
Локтас гожөм челядьдырся шудөн:
Вугыр, шатин – ставыс менам эм.

ТУВСОВЪЯ ВАДОРЫН. РЫТЪЯ ВОЙӦ

Рытыс лӧнь ю весьтӧ ӧшӧдіс русӧ –
Кыалӧн медбӧрья ӧгырыс кусі.

Тувсовья вой сӧсся шымыртіс эрдьяс...
Войсӧ, сьӧд каньӧс моз, топӧда бердӧ.

Малышта. Дыр сійӧ меліа мойдас –
Бара нор казътылӧм сьӧлӧмӧс дойдас.

Казътывсяс: коркӧ ӧд вӧліны войяс,
Волывлім ю дорас, томьяс да збойяс.

Майбырӧй, эз тай сӧк ковмывлы корӧм!
Шызьӧдлім вадорсӧ сьыланкыв горӧн.

Войыс лӧз бордьяса тури моз лӧбліс,
Борд улас ӧртьяскӧд асылӧдз дзебліс.

Сы йылысь казътылӧм сьӧлӧмӧс дойдӧ,
Сы йылысь тувсовья вой меным мойдӧ,

Быттьӧ шог ру пиӧ сойбордйӧд пыртӧ –
Тӧвзисны вояс, и вадорыс тыртӧм...

КОР ЛОКТӨ ВЕЖ ТУЛЫС

1

Кор локтө веж тулыс –
Сэк гажтөм оз сулы.
Сэк сьөлөмөй сьывлө
Да кыпөдчө вывлань.

И усьны оз тэрмась,
Дыр өшавны вермө –
Лөнь асывсянь öзйө
Му весьтас бур йөзлы.

И ыпьялө жара
Водз тулыссиянь арөдз –
Дерт, медсясө сылы,
Код медмуса нылыс.

А шуас кө сийө:
«Оз сьөлөмыд биав,
А шондiыс тайө
Мем шоныдсө вайө!»

Ог пыр ськөд венө,
Көть увтыртө менө:
Мед чайтө, мый шондi –
Лөз енэжсянь шонтө...

Волывлө тувсовья войыс
Радлунөн... Волө и дойөн.

Топөдө войыслөн лөньөн
Сьөлөмөс, быттьөкө вөнбөн.

Лөньлунсьыс чуналө пельыд!
Төлысьыс жугыль да кельыд,

Быттьөкө муслуныд тэнад –
Шогөй и нимкодбөй менам.

Чужлөма войыслөн чөлысь,
Муслуныд – олөмын төлысь...

Ылісянь югьялө-ворсө,
Лөдсалө сьөлөмысь норсө.

Тэланьө писькөдча-муна!
Уна на тэ дорөдз, уна.

Тэ вылө радейтчөм здуксянь
Тувсовья вой нэмө пуксис.

Сорласис вемөсыс, вөтыс...
Мый лоө?
Код сійөс төдө...

Төвсьыс тыыс муртсышт гыа...
 Рытъя шонді уси тыас,
 Но эз вöй, а гыяс вывті
 Ньöжйöникöн мелань кывтö.

Кывтысь шондісö ме аддза:
 Локтö төвруыскöд татчö...
 Гумовта ме сійöс соддзöн,
 Юа – шонала и коддза.

Пытшкын быттö бипур öзьяс,
 Меным долыдлунсö вöзьяс:
 Кута гажöдчыны-сьывны,
 Оз-ö мусаясöй кывны.

Оз-ö ылавны да локны –
 Зэв на перыд налön кокныс!
 Рытъя тысьыс юöm шонді
 Ачымöс и найöс шонтас.

Волы, муса менам, волы –
 Коді тувсов гажсьыс поліс,
 Пытшкас шондісö эз новлы –
 Сійö му вылас эз овлы...

Увтасінас – тōдан өд –
 Кōні ёльыс варов,
 Шонді пуксян рōмыдас
 Аддзысям на бара.

Коддзылам сэн винатōг –
 Бытьё райō лэбам...
 Увтасіныс миянōс
 Йōз синъясысь дзедас.

Сьōлōм пытшсьыд дойястō,
 Полōмлунтō вōтлыв...
 Тайō гажа вой йывсьыс
 Некод оз и тōдлы.

Некод,
 Мый эг кольōй ми,
 Тэа-меа, шудтōг!
 Варов эськō ёльыс да,
 Сийō өд оз удты...

ПАРКЫН

Паркыс кыпыд Сыктыв паныд –
Паркысь муніс төвся шог.
Йөзыс гажөдчөны тани,
Йөзлы меөдз абумог.

Да и меным йөзид веськодь,
Менам аслам төждлун эм:
Енмыс мойвиөдіс эськө
Мича аньөс паркас мем.

Сөмын бара личкө рөкыс:
Кутшөм бурөн көть эн вөв,
Аньтө ылөддыны сьөкыд,
Кодыр зептад шы ни төв.

Менам сьөлөм шмоньтө лэптө,
Меным озырлун оз ков:
Кодыр мортлөн тыртөм зептыс –
Сэки гректөм жө и лов!

Мыйысь майшасьнысө сэні:
Талун сымда мича ань
Паркас нюммунісны меным –
Но и аттьө! Но и шань!

* * *

I

Весьтын кельыда дөввидзö тöлысь...
Кöнкö сикт помын ворсöны кöлысь.

Войся рöмыдас сьыланкыв öзйö...
Гудöкассьысьлы сьылысьыс вöзйö

Панны вен – кодлөн эбöсыс бырас,
Лолыс вензигас öдйöджык тырас.

Ворсö-юралö сикт помын гажыс,
Вунлö кывзигад выльыс и важыс.

Юргö сикт помын ворсöм да сьылöм!
Тайö гажсьыс пöсь эскöдöм кыла –

Гозья шуд вылö лачаыс шонтö:
Налы гожöмыс нюжалас помтöг...

II

Збодер да и вёрысь на,
Ён на, быттьо коз –
Отнамён и пёрысьма,
Кодзыд менам поз.

И коть гожся шонділён
Кузь на ветлан кытш,
Оз тай вермы шонтыны
Менсьым керка пытш.

Дерт, и өткөн олигён
Эг жё съодас ов.
Бур йёзыслы кола на –
Сідз тай чайтё лов.

Эг ов тыртём сёлёмён,
Вөлі төжд и мог!
Югьд луньяс вөліны...
Сөмын босьтлө шог,

Аддзывла кор вөтъясөн:
Көнкө, сэтшөм шань,
Пёрысьмө жө өтнасөн
Меным чужлөм ань...

III

Чань кодь визув гоҗся шоныд төлыс
Варовөн да шаньён мекөд вөлі.

Садьмөдіс чөв-лөньсьыс восьсаингъяс,
Висьталіс мем, кутшөм тэнад сингъяс.

Кыддза вөрын, гоҗся рытө коркө,
Сёрнитім тэ йылысь вөрса шоркөд.

Өні төда, кутшөм тэнад юрси –
Аттьө шорлы тайө вөчөм бурсьыс!

Рыгтя войө кайис мөдлапөлысь,
Пемыд войсө эзыяліс төлысь.

Шөпкис меным енэжөдыс келіг,
Кутшөм тэнад серам горыд мелі.

Войыс коли. Кайис югыд расысь
Шондіыс да вайис мулы асыв.

Шонді водзас сувта пидзөс вылам,
Кевмыся да, гашкө менө кылас:

Дзирдгъяснас веж муяс весьтын ёрсиг
Индас меным, кытысь тэнө корсьны...

* * *

Вөйлі долыдас и шогас,
Майшасьёмас, тōждас-нокас.
Доймывліс и бурдліс сьёлөм,
Тэкөд ставыс менам вөлі.

Ставыс вөлі да и коли...
Вөрса сөстөм визув ёльөн –
Вутшьяс-мырьяс костө пыри,
Сэсся разаліс дай быри.

Кывтіс олөм горувланьыс
Миян муслун ёльным, шаньёй.
Сэтысь соддзөн юи эськө,
Сөмын горшөй эз и веськав.

* * *

Лөнь на. Төвру оз на ризьяв.
Видз пасьтаыс – дона изьяс:
Лыдтөм-тшөттөм лысва войтö
Шондi асья мойдсö мойдö.

Лысва пиас көмтөг пыра –
Долыдлунөн сьөлөм тырас!
Но шог мөвпьяс оз жö вунны –
Збыль мöй коркö ковмас мунны

Тайö олөмсьыс да мусьыс?
Кыз нö майшасьыс он шусьы:
Кодлы тайö ставыс кольö –
Расьы, давйыс, виддзыс, ёльыс?

Кодi шензяс тайö мичнас,
Югьд лысва тыра видзнас?
Вичкоö моз татчö волас?
Дыр-ö коми войтыр олас?

* * *

Кöні эзысь горнас чужö юыс,
Енэжсö көн вөрнас пыкö муыс,
Кысянь шондi асывъяснас петö –
Коркö батьö нулис вотны сэтөр.

Мунiм видзьяс, сёнъяс, тыяс пöлөн...
Быдторйö на чуймысь челядь сьölöм
Вöйтчис лэбач дзольган гажа шыас,
Дзоридз кöра асья төвру гыас.

Шуис батьö вежа гожся лунö:
«Ме ог ло, да татчö туй эн вунöд.
Коркö босьтчан челядь быдтан уджас –
Налы сэссия вотчаниныс вуджас».

Дзирдавлывлö весьтын гожся луныс,
Некодöс мем батьö туйöд нуны.
Ачым ог төд: мыжтöм али мыжа?
Öтнамөн и кивта олöм пыжас.

Кымын водзö верстямма да ола,
Сымын доя, сымын висьö лолöй:
Коркö кадыс батьö дiнö нуас,
Аддзысям да, мый на батьö шуас...

ШОЙНА ВЫЛЫН

1

Мир туйсяньыс татчö медводз жежа –
Дзик быд изтор тані меным вежа.

Татчö быттьö юалöмөн вола –
Морт ногөн-ö, ошкана-ö ола?

Шувгö коз пу мам-бать гуяс дорын,
Ваыс сёльгö шойнабердса шорын,

Кöнкö маті расын колип сьылö –
Быдлаысь ме бать-мам сёрни кыла.

Öні тадзи сьөлöм накöд йитны...
Кывзыся да – оз на быттьö видны.

Татчö, потшöс саяс, креста йöрас,
На дінö и ме тшöтш коркö тöра...

Тані Геня другё. Тані Лёша другё.
Майбыр, налысь унсё кодкё өмөй дзугё?

Сывъясисны найё помасьлытём войкөд,
Янсөдчисны важөн висьөмъяскөд, дойкөд.

Некод налөн абу велөдысь да долбысь...
Пессы, майшась, вийсы, таладорас кольысь.

Вөлись, аттё Енмө, му вежөмыд вои!
Еджыдыс и сьөдыс – ставыс вуза лои.

Сы понда нин колё майшасьны да повны,
Вуза мед эз лоны сьөлөмным да ловным.

Пачё эндём шыд моз таладорыс шузьё!
Шойна муас вуджём сөмын лөня узьё.

Немторсё оз төдны. Бур, мый оз и төдны!
Торкавтөг мед кывтё помасьлытём вөтныс...

* * *

Дөзма – карсө ёра,
Чери кыйны кора
Лэччөдлыны ёртөс,
Сюсь да писькөс мортөс.

Гожся рытө кыкөн
Тылань лэччам ськөд.
Тыыс – джуджыд йира,
Ёкыша да сира.

Шөрас ветель чөвтам,
Ляпкыдинсө көвтам.
Сэсся юква пуам,
Пөттөдз сёям-юам.

Гожся ывла вылас
Шудсө лолысь кыла
Ёкыш юква көрсьыс,
Тысьыс, видзьыс, вөрсьыс.

Сэсся төвнас кута
Вөйтчывлыны шудас,
Казьтывла кор важсө,
Гожся олан гажсө...

МӨДЛАПӨЛАС...

ТАЛАПӨЛАС...



МОРТ НЭМ

Пестö шондi лэбач горсö,
Тшапа югөрьяснас ворсö,
Ловтö ышöдана öзйö,
Уна эскöдö да кöсйö.

Кайлö-волö енвевт шөрö,
Видзöдан да – бөр нин пөрö...
Му вылас тадз мортыд волан,
Ыджыд кöсйöмьясөн олан.

Уджсö муртса босътлан киад,
Здук – и вöян пемыд пиас,
Быгтьö йирö потём пыжөн.
Мый он вевъяв – ачыл мыжа...

* * *

Кор дөрөм соссө рытыс көрас,
Енвевтсө төлысь гөрнас гөрас,

А сэсся водзё уджсө вөчас –
Енвевтас эзысь шыдөс көдзас,

Быд тусьысь войнас кодзув петас
Да мичсө ывлаислы сетас –

Сэк быдсөн унмовсьыны повла
И вөттөг сыысь шуда овла,

Мый Енмыс менам олан здукө
Со татшөм мичлун мекөд юкө...

МӨДЛАПӨЛАС... ТАЛАПӨЛАС...

I

Мөдлапөлыс, майбыр, сэтшөм авъя!
Мөдлапөлыс, майбыр, кыддза давъя.

Дзоридз көрсыйс юрыд быдсөн висьмө!
Өмидзыд и озйыд сэни кисьмө.

Сэни шонди юө югыд шорсьыс,
Сэни төв ныр раммө лэбач горсьыс...

Сэни дона гоблы муыс выя!
Чериаось вөрзьөдлытөм тыяс...

Тыяс гөгөр – мича турун эжа!
Сэни весиг йөлөгаыс вежа...

Мөдлапөлас олөм кыпыд лола!
А ме, йөйыд, талапөлас ола...

II

Талапөвсьыс дөзма, сосьяс пуджа!
Вөча пур да мөдлапөлас вуджа...

Вуджа, пыра нөрысйывса вөрас –
Кыддза-козья чөлас, дзоридз көрас.

Чөсмася сэн өмидзөн да озйөн –
Пыра овны вөрса мазі позйө.

Бордъяся, да мазі ачым лоа!
Масö корсьны видзяяс вылö воа.

Тадзи мазі тöждъяс пиас суна,
Медым сэсся морт олөмөй вунас...

Мыйта коли – мазіөн и ола!
Талапöлас шочиника вола...

Гашкө, гортөс видлынысö лэбла!
Янсөдчөмсьыс сьөлөм дойөс дзебла

Мазі тöждас, гажа мөдлапöлас!
Талапöлыс көдзыд, чизыр төла...

III

Талапöлыс көдзыд, чизыр төла!
Кутас сэні куткырвидзны чөла

Меөн кольөм сьөлөмшөрөй-гортөй –
Олөм визув вылас лэптысь бордөй...

Сэтчө вичко праздникъясö волө
Важөн кувсьөм мамлөн вежа лолыс...

Керка пытшсьыс, йөрсьыс, керка дорсьыс
Менө, көнкө, ветлөдлө да корсьө.

Батьлөн лолыс кокни руөн-төлөн
Ветлө өшинь увті, керка пөлөн...

Дивитөмнас ойдөма да шогнас –
Керкабердса муыс тырө ёгнас...

Важмөма да пöлыньтчөма йөрөй!
Вежыньтчөма пывсян, регыд пөрө...

Керка весьтысь асыв вөтлас войсö –
Төдөмлуныс пытшкө пестас дойсö:

Чужанінлы талапөлас кола!
А ме век на мөдлапөлас ола...

VI

Мазі олөм дыр-ө сөмын ола?
Сьөлөмөйлы ковмас курыд-сола...

Кутас лолөй майшасьны да висьны!
Өмидз-озйыд мед көть оз и кисьмыв...

Сьөлөмөй оз бурмы дзоридз манас –
Талапөлыс ковмас юкмөс ванас.

Талапөлыс уна пөлөс доя –
Но и көка рыта, югыд воя.

Челядьдырся мойдьяс видзө асыв
Колип сьыланкывьяс чужтысь расын.

Асья шонді өшиньясянь ёрас –
Чужан сиктө, талапөлас корас.

Мазі олөм коля мөдлапөлас –
Бара, йөйыд, вуджа талапөлас...

* * *

Шоныдыс кольёма войт,
Аръявыв ывлаыс каттьё...
Дойд менсьым сьёлёмөс, дойд –
Сыысь ме шуа тэд аттьё.

Жалитны менё оз ков,
Важөн нин олёмой курыд.
Мусаёй, дойд – и эн пов, –
Мед кольё сьёлёмө вурис.

Тэ дорын збойён эг вөв,
Колана кывъяснас сёрми!
Сійён и ветлөдла чөв,
Кадысь водз сійён и дзорми...

Дойд! Дойсьыс дзыкөдз ог чег –
Сійё и лоё мем бурыс,
Дойнас кө казтылас век
Тэ йылысь сьёлёмын вурис

Бурдлытөг, лун и вой,
Кытчөдз ог мын олём сывсьыс –
Кылі мед сьёлёмысь дой
Гөррдзасьтём радейтчөм йывсьыс...

* * *

Кыа ветліс шондіыскөд гозйөн –
Да и колис рөмсө пельсы розйө.

Долыдмөдіс арыс тусьөн-тшакөн,
Кывсис вывті озырөн да тшапөн...

Пестераыс вөлі майбыр-мортыс,
Весиг дышыс тырөн воліс гортас!..

Петіс вой төв, вайис сьөрсьыс шляча –
Майбыр лои, коді песка-пача...

Дзормис енэж сё арөса пөль моз!
Арыс юис зарнисө да гөльмис...

* * *

Тупкин енвевтсö роч нойöн,
Шальнад вевттин ывла выв.
Арся войöй, пемыд войöй –
Чиган доддысь усьöм ныв.

Лов эз бурмы лунся гажысь,
Сэтысь кыпыдлун эг кыв.
Тэнö виччыся ме важöн –
Пелькөдöма кильчö выв.

Тöлысь исергаа пеляд,
Керка югөр вылö лок.
Некод вылö тэд ог элясь,
Некод вылö абу лёк.

Кыкөн пукалыштам чöла,
Тэсянь бурөдöм ог кор.
Кадыс – көдзыд. Кадыс – тöла.
Кадыс – зэра. Кадыс – нор.

Но и öнi овны колö,
Сöмын пола: куса сiдз,
Он кö пыр да öтка лолöс
Асья кыаөдзыс видз...

* * *

Лыска пуяс кындзи
Кушмис мукөд пуыс...
Лым чир бөрся лым чир –
Со и еждіс муыс.

Сьөла-дозмөр важөн
Парма пытшкө дзебсис.
Шоныдыс да гажыс
Турияскөд лэбзис.

Вывсянь дзоргө чөла
Көин синнас төлысь.
Сизим пельө сьөлөм
Потө войся чөлысь.

Гожөм бөрас эськө
Унмовсьыны колө!
...Дзирднас керка весьтянь
Кодзув чуткас лолө.

Сывьясям, да ськөд
Шогнымөс ог йөртөй:
Асылөдзис кыкөн
Кольөм йывсьыс бөрдам...

* * *

К.

Төвсьыс быдсөн пола –
Тола вылын тола...
Кодлы пö и кола?
Мый понда и ола?

Тола вылын тола...
Ме ордö кө волан –
Сідзкө, тэныд кола...
Та понда и ола!

* * *

Арсьыс ывлаыс важон нин бурдөма...
Чужан керкаой лым пиас турдөма.

Ошиньясөдзыс толаас пырөма...
Пытшьыс шоныдыс, коньөрлөн, бырөма.

Эськө кайны да пачьяссө ломзьөдны,
Пытшьыс көдзыдсө шоныднас повзьөдны.

Чужан керкалысь шогсьөмсө кыла ме –
Сөмын аслам став эбөсөй сылөма.

Абу эбөсөй пес дорсьыс зыртнысө
Джуджыд лым... Пессө поткөдны-пыртнысө.

Абу эбөсөй пачьяссө ломтыны –
Менө ачымөс некодлы шонтыны.

* * *

Кор льём пу кисьтö лымсö менам садьö,
Рыт пуксиг тöлысь лэччылö лöз вадйö.

Вадбокса вöрын колип дзольгö-сьылö...
А тöлысь лоö том да мича нылөн.

Лöз вадас пырö зумыд вира-яя,
Дыр купайтчö да енэжас бöр кайö.

Му весьтас сэсся асылöдзыс югзьö...
И еджыд воя кад сэк татчö пуксьö!

АВГУСТЫН КИСЬМӨНҮ КОДЗУВЪЯС

1

Лэбис нин вөр сайё юль тшөгөм дзодзөг моз,
Войясыс төдлытөг пемдісны бөр...
Августын му весьтас кисьмөны кодзувьяс!
...Тшакөн да вотөсөн тырөма вөр.

Пемдытөдз туйсө пув өкта-кокала,
Койышта китырөн роз бөрся роз...
Кодзувьяс – энэжын! Кодзувьяс – кок улын!
Кодзувьяс – намыр и сьөлаоз!

Рас пытшсянь долыда шыасьлас сьөла –
Майбырлы, шоныд, и кынөмыс пөт...
...Збыль өмөй тадз коркө шудаөн вөлі ме?
Збыль өмөй лола на коркө? Ог төд...

Шевкнитчөм киясөн вөр шөрас плавгыся...
Му шар и кодзувьяс! Олөй на дыр!
Сьөлөмөй августөн!
Августөн!
Августөн,
Быттьөкө медводдза муслунөн, тыр...

Отпускын

Со август вайис меным шойччан луньяс...
 Ме шума карысь сэтчө бара муна,
 Көн сьолөмөй медшуда овлө пыр,
 Көн олөмыс поэзияөн тыр.

Көн лолөс нэм чөж дольдмөдө серпас:
 Крут нөрыс йылын шипер вевта керка;
 Көн көдзыд арөдз вевттьө керка дор
 Веж дзоридзьясысь небыдик ковөр!

Көн сьökыд уджысь чорзьём киа войтыр
 Көть зумышөсь, но лёк кывйөн оз дойдны!
 Көн пармаыслөн лывкйөдлана гор
 Пöч нэмьясянь да аски на оз ор!

Көн йөлөгаыс сэтшөм збой да авья!
 Көн юмов сэтөр тыртө төдса давьяс –
 Мем сы вывті оз ков и виноград...
 Ас чужанінын колля шойччан кад!

«Мыйла колам, мыйла олам»

П. Шаховлөн паметьлы

Зорөд пытшкын узылан кадө
 Тайө дзоридз тыра вадыс
 Бара овны менө тшөктө
 Наянлунтөг, лёктөг, лөгтөг.

Коді бурён локтö, бурён
Паныдавны – няньён, сурён,
Пызан вылын тасьтi-паньён...
Лоны быдён дiнö шаньён!

Быттьö шуö тайö вöрыс:
«Шаньён ло, но, сёлөмшөрöй,
Эн жö радейт чужан мутö
Сийöс дойдысьлы кыв шутöг».

Август! Август! Авъялуннад
Быттьö кöсьян меным шуны,
Быттьö тшöктан пельсь рознад,
Медым видзи синьяс моз жö

Уна рöма чужанiнöс –
Мед эз лякны, сотны, вины...
Гашкö, та вöсна и ола?
Гашкö, та вöсна и кола?

4

Ыджыд вотчан йөрөн
Лои тöдса яг.
Дультö пычкан көрөн
Пачын косьмö тшак.

Немторйөн оз лыддьысь
Август – сэтшöм шань!
Гөститөдö быттьö
Менö коми ань.

Но и сылөн пызан!
Төкөтбө оз чег!
Пуксылан – и кызан...
Тешыд лоо сэк!

Ма кодь юмов кеня
(Пөръясьны ог мод!)
Сэтөра варенньо...
Өмидз эм и чөд.

Вөньтө сөмын личөд –
Унджык төрас мед...
Август, коми ичмонь,
Сё пасибө тэд!

5

Шөйта кыддза давъяс пөлөн...
Сэни кокни бордья төлыс
Бытбө полян вылын ворсө
Меным гажасө и норсө.

Сыысь ворсан сылөн долыд,
Мый оз вунөд, век на волө,
Век на туйсө шонди аддзө
Ыли вөръяс сайсянь татчө.

Век на мазыслы тшөктө,
Медым масө сийө өктис –
Асывсянь да рытъя сөрөдз
Шобис дзоридз бөрся дзоридз.

Мазі мозыс ветла-корся
Тайё кыддза давъяс дорсьыс
Вижьюра да катшасинма
Йёзысь дзебсьём гажаиньяс.

Лольшта сэн дзоридз көрсө,
Да көть ог лэдз сэсся бөрсө!
Август помын, гождём помын
Лоа медбөрьяысь томөн...

Регыд мулысь гожся серьяс
Кусодасны көдзыд зэрьяс!
Сійён төлыс меным ворсө
Гажаыскөд тшөтш и норсө...

6

Август помын

Тыртөммөдіс август лэбач поэяс,
Сикөтшаліс сьөдөн льём пу розьяс...

Йиркакыліс-зэрис Илля лунё –
Гожся зэрсө төвбыд мед эг вунөд.

Гожся олан гажсө мед эг вунөд –
Гажтём луныс водзын уна-уна.

Арся ног нин шогсьө менам лолөй!
А өд кызкө водзө овны колө...

Лолөн шогся – киясөн ог шогсьы:
Пемдытөдзыс керка пытшкын нокая –

Дзоньтала да мавта ыджыд пачөс...
Мый вылө нин, сьөлөм, видзан лача?

Август помын бөрья гоҗся лунлы
 Сёрниясысь кыа мудер лэч –
 Бытьё муса ичмонь көсйö мунны,
 А ме сійöс ылöдла, ог лэдз.

А ме сійöс öдзöс дорын кута,
 Сёрнитöда, дырджык мед оз пет...
 Гожöмыскöд сэтшöм вöлі шуда –
 Гажтöмтчыны, майбыр, мем эз сет.

Да öд сійö менсьым оз и юав:
 Воськовтас – и вöлі-ö? Эз вöв?..
 Ыркыдöсь нин войяс, арся руö
 Дыр кежлö нин вошлö мöдлапöв...

Гашкö, сöмын лолысь дыр оз чин на
 Гожöмсяньыс кольöм шондi жар...
 Öти ичмонь – гоҗöм – мунас дiнысь,
 Но мöд ичмонь пырас гортö – ар...

Светланы

Лöнь тыö став кодзувнас усьöма енэж...
 А көсьян – ме ар йивсьыс висьтала тэныд?

Тэ ме вылын эскытöг нюмъявны мöдан...
 Но збыльысь: ме арыслысь воан лун тöда.

Сэк талунья моз жö веж нöрысьяс боктi,
 Мед аддзысьны тэкöд, лöнь ты дорас локта.

И тэ меным ты дорас жугыля шуан,
Мый мөд динө, мөд динө сьөлөмыд нуө...

И гортланьё бөрсө ми мөдөдчам торйөн –
Сэк енбобув чукөрөн лэбзясны корьяс...

Сэк енбобув чукөрөн лэбзясны корьяс,
Сэк эзысьсө лыддыны дугдасны шорьяс...

И турияс сы йылысь бөрддзасны бара,
Мый гожөмыс талунсянь вежсьома арөн...

9

Август! Август!
Мунан нин да, гашкө,
Уна тэнсьыд корны оз и позь –
Бөрья гожся зэркөд, шондї гажкөд
Өткалунөс менсьым сьөрсьыд босьт.

Небыд лун төв бордйөн шогөс тывъяв,
Тöлысь выйөн сьөлөм динөс мавт!
Медым менам арся сьыланкывйын
Югыд вирнас ворсис тшөтш и май!

Шөрипөв мед серавсис и бөрдсис...
...Лолын овны көсйөмыс оз чин,
Пыртөдзыс кө югзьөдлас на өтчыд
Гожся шондї менсьым чужанін...

* * *

Елена Козловалы

Гожся шондіыс енэжөд уйө...
Тэнад керкалань векныдык туйөд
Дзирыд кар шөрсянь прөст кадө кежан –
Воан ыркыдас, гажаас, вежас.

Лэбач дзольгөмөн керкаыд ойдө,
Бытьё олан он карын, а мойдын.
Тані лолөй и аслам тшөтш сьылө,
Гожся шонді моз качөдчө вылө.

Кодыр гожөмыс сьөлөмад кывтө –
Татшөм здукьясө олан мөй сьывтөг!
Мыйкө бурджыкыс му вылас эм-ө
Войвыв гожөмлөн дженьыдык нэмө?

Жугыль мөвпястө вежөрсьыд вешты –
Мунас гожөм, но мойдыс оз эшты:
Арся шондіыс гожсясө вежас –
Керка гөгөртө зарниөн эжас.

* * *

Йөрүн вижьюр дзоридзьяс пöрысьмисны-дзормисны...
Юркытш вылö вотнысö нывьяс найöс сёрмисны.

Мичаöсь да кöраöсь дзоридзьясыс вöліны,
Кодзுவьяс моз öзйисны йöрын потшöс пöлöныс.

Кодакості гождöмсö арлань кадыс синöма?
Гожйöдана эбöсыс ывлаыслөн чинöма.

Енэж шөрö тöлысьыс вывлань сюрөн чергöдчис,
Чужöмбаннас шондіыс арьявылö бергöдчис.

Быгалісны видзьяслөн уна рöма серьясыс,
Ыркалісны вочасөн гожся шоньд зэрьясыс.

Вижьюрлысь дзор юрсисö төв ныр нетшкö-төлөдö!
Ветлөдлö нин асылыс пужйөн мöдлапөлөдыс...

* * *

«И вот – сентябрь...»

Е.Баратынский.

И вот – сентябрь!

Сы дінө быдса во пыр

Ме кысси-локті. Копыр сылы, копыр.

Сентябрь! Сентябрь! Му весьтас төлысь пыжа!

Дзик ставсьыс сійө ошкана и мыжа.

Водз арся төлысь сійөн меным муса,

Мый ывла вылыс абу жар да буса.

Мый йөзкөд бара лышкыдасьö вöрыс!

Но сёлөм дойдө арся төвру көрыс.

Мем тайö көрыс – курыд синва доя,

Öд матын кадыс – лымъя, көдзыд воя,

Кор төлыс йиөн водас юö-ёлё,

И арыс сөмын казтылөмъяс кольö –

Кызд бөрья шоныд зэрнас ывла пывсис!

Да арся жугыль синма нывка йывсьыс...

Мый вöлі ме и радейтысь, и шуда...

Сентябрь! Ме тэнö лолын видзны кута.

* * *

Ныжмисны шонділөн югөрьяс-ньөвьяс –
Доддяліс арыс гөрд бурыся вөвьяс.

Доддяліс – да и со му весьтөд лэбө,
Жугьльтчөм расьяссө зарниө дзебө.

Вад бокысь пипуяс öзталө-дурө,
Турипув сикөтшсө кисьтөма нюрө.

...Сьөлөмын көсйөмөс новлөдла чөла:
Кыйода здук – да и ар доддьө сөла.

* * *

Чужанінӧс серпасалӧ бара
Левитанысь мастерджык на арыс...
Гӧрда-вижа югыд сера мичнас
Арся вӧрыс асыкалӧ видзьяс.

Вайӧдӧны быттьӧ пышйӧм вӧлӧс –
Парма пасьта юргӧ уна гӧлӧс:
Шуда вотчысь тайӧ гажа кадӧ
Письтлывлӧ быд вожӧ: ылӧ, матӧ...

Йитчы тэ тшӧтш, сьӧлӧм, арся гажас,
Медым вежӧр этшаджыка важас
Косавліс да шогсӧ сэтгысь корсис,
Орӧдчис мед гажтӧмсьыс да норсьыс.

Видзӧдіс мед ёнджыкасӧ водзӧ –
Ӧзйӧ на сэн туй индалысь кодзув!
Эскӧдӧ на бурас мудзӧм лолӧс
Ар кодгыс жӧ уна рӧма олӧм.

НЫВБАБА ГОЖӨМ

Регыд нуасны вөрсайса туньяс
Гажа арыслысь медбөрря луньяс.
Сійö ывлаыс ыпьялö-öзйö,
Тэа-меалы мичлунсö вöзйö.

Волас төв ныр – и кенялö расыс
Усьöм корьяснас тыясысь васö.
Расас олыштам! Сылы ми колам!
Сэни асьным тшöтш югзылам лолөн.

Ичмонь олөмөн ывлаыс олö,
Дзебö мичлуннас ичмоньлысь полөм:
Мый тадз öтнасөн весьшөрö эндас,
Мичыс некодөн казавтөг пемдас...

* * *

Лэбувъясö арся помтöм зэрсыйс
Картупель кос поводдянас керсис.
Шойччö муыс керка бердъяс йöрын,
Сиктса войтыр асывсяньыс вöрын.

Озырлуныс помтöм парма эрдас!
Зильöн ло – и во чöж сэсся вердас.
Майбыр вöрса ордымъясöд шöйтны,
Шогъяс арся зарни пиас вöйтны.

Арся раслөн шпоргöм сэтшöм мыла!
Ачымöс тан быттьö гортын кыла,
Сьöлöм аслыс бара этша корö:
Юктав кöдзыд ванад, визув шорöй.

Сьöкыд мудзöс пожъяв, горшöс веськöд!
Вöрса шорöй, воöдчыны эськö
Олöм помö, бöръя воськов дорö,
Нэмöс вуджны тэ моз сöстöм горөн.

* * *

Гожйөдчысьыс вадорьясысь бырө,
Водз нин сиктöй вуджөр сайö пырö.
Ывла мозыс ме тшөтш арö вуджа –
Коркө быдөн босьтчö тайö уджас.

А өд волö арыс – шог да тыртөм...
Волö – бытьö купеч ордö пыртö!
Озырöсь сэк грездыс, сиктыс, карыс –
Гожöмыслы донсö сетö арыс.

Кадыс ар моз юалөмөн волö:
Дзорман нин – а мыйөн озыр лолыд?

* * *

Помасьö гожöм. Оз югъяв веж асылын лысва.

Сы пыдди еджыдөн

водпывлö му вылö пуж...

Гожöм! Оз арлань көть – тэланьö сьөлөмöй кыскö,

Томлунöс моз жö

мунöмсьыд кутны тэнö ог куж...

Исковтысь кадсьыс он дзевсьы,

он пышйы,

он дорйысь...

Олөмад ар бöрын

тулысыд сэсся оз во!

...Öзьясны расьясын

зарниöдз гожъялөм корьяс,

Пельсь гөрд розьяснас ыпмунö: мый лоан ло!

Ранитчөм лэбач кодь вөр весьтас бордпöла кыа,

Кельдöдö турун, и гажтöммö юбердса кöдж...

Чери оз гыбав,

оз ворсöдчы кöдзалөм тыын,

Помасьö гожöм!

...И томлунöй помасьö тшöтш...

* * *

Со и коли луныс. Бара пемдіс.
Арся рытыс төлыся, но шог.
Мортыд мыйкө виччысян став нэмтө,
А мый нэмтө виччысян – оз лок.

Пессян-вийсян, шудсьыс мед он удзав,
Ставсө венан – төжд, и лёк, и мудз!
Быттьө эськө кодзувсө нин судзан –
Да вот медся югыдсө он судз.

Майшасьөм сэк пыткад водө йиөн:
Олан со, а олөмад оз кеж
Мыйкө медся коланаыс... Сійөс
Сьөмыд ни патераыд оз веж.

Оз веж өтув гажыс муса анькөд,
Оз веж весиг челядь быдтан шуд...
Сөмын весьтад ыпьявны оз ланьтлы
Медся югыд кодзув – дзирыд чут.

«Судзөд!» – быттьө дэльөдөмөн дольө,
Бытшкө ловтө, майшөдлө юр вем...
Пессян, вийсян, нюжөдчан – но кольө
Арся лун кодь аслад дженьыд нэм...

* * *

Лолöй, коньöр, йизьöма,
Быттьö арся ном:
Топöдисны висьöмьяс,
Абу налы пом.

Майшасьöмөн ойдöма,
Нуа накöд вен...
Мыйысь пö и дойдалö,
Ёрö менö Ен!

Сöмын дзик ог турды на,
Нюжöдчы да ланьт.
Эм и менö бурдöдысь,
Авья, вына, шань.

Майшасьöмысь бурöдö,
Лэптö олан ру
Вотöсөн да турунөн,
Видзö чужан му.

Коркö тані чужлі да –
Ме дор на быд сі.
Крепыд коми вужйысь –
Кокниа он ви!

* * *

Куйлігад ньылём оз киссьы –
Водёмён шойччөда мыш.
Важён нин немтор оз гижсьы,
Музаёй ас кодь жө дыш.

Важён нин лючки оз овсьы,
Оз бурмы немторйён лов.
Умёма няньсьыс и совсьыс –
Няньыс ни солыс оз ков.

Зэра көть шондіа асыв –
Гортын и ывлаын шог.
Төлыссьыс вижөдіс расыс,
Керкаын – джодж тырыс ёг.

Мед! Он тай, майбырөй, коньясь,
Лун-мөдтө олас на сідз!
Кузь войбыд увтчөны поньяс,
Войбыд оз ланьтлыны лич.

Да сөмын ун вөтлысь дойыс –
Сөмын-ө поньяслөн мыж?
Жальлун оз төд арся войыс –
Сьөлөмө сатшкөма гыж.

* * *

Нэмад шуд он судзөд,
Олөм – розя пыж.
Мудзи, другө, мудзи, –
Водзө сынны дыш.

Ваён кылөд рудзөг,
Абу кө тэ шыш!
Мудзи, другө, мудзи, –
Юр вем песны дыш.

Сьökыдсьыс эг удзав –
Ставсө төдліс мыш!
Мудзи, другө, мудзи, –
Уджавнысө дыш.

Тышө ки оз луддзы,
Ныжмис пинь и гыж...
Мудзи, другө, мудзи, –
Весиг овныс дыш!

Кодлөн нывтор, кодлөн питор –
Быдёнлөн да кодкө эм!
Өткалунёй, мыччы китё,
Тэкөд колляла ме нэм.

И көть аньясыдлы, ёртё,
Уна сиавла ме лэч,
Өнөдз олөмө да гортё
Сьөлөм некодөс эз лэдз.

Көк пө сөмын олө позтөг...
Но оз шымырт менё шог:
Тайё муас овны гозтөг –
Абу медся ыджыд лёк.

Некод немтор мем оз дасьты,
Да мем дасьыс оз и ков:
Абу көмтөм. Абу пасьтөм.
Тыртөм юрөн Ен эз ёр.

Югзьөдөны, бытгьё битор,
Мукөд могъяс менсьым нэм...
Кодлөн нывтор, кодлөн питор,
Менам өткалунёй эм!

Кор төлысьыс, быттьо виж таб,
Пыр шөрланьö енэжас лыбис,
Ми ёрткөд кузь вой сэки кыбим,
А му весьтас шувгис сентябрь...

И кылөдіс ас вылас ю
Пельк пыжнымкөд водзö и водзö
Виж корьяс да лыдтöм виж кодзув,
И узис лөнъ пемыдас му...

Ёсь айдлассö веськөдіс сэк
Пыр мичаджык чериö ёртöй,
А ме көсийи катöдны гортö
Да асылөдз кыйöді век

Лөнъ ва вывсьыс кодзув медтшап:
Час, айдласөн крукышта сійöс
Да, зарниöс, кватита киён!
...А му весьтас кывтіс сентябрь.

И войыс тшöтш кывтіс... И мед!
Ме ас вылын сыысь ог серав,
Кöть ёрт кыйис ноп тырыс чери,
А мем – öти кодзув эз шед...

ИЧӨТДЫРСЯ

Вөйліс ывла войся лөзовсьөдө,
А ме эшкын улын – югыд вөтө.

Мыйкө буртор вөтаси – да вуніс,
Кодыр войыс керка пытшкысь муніс.

Вөт бөрсяыс вежөрөй эз вөтчы:
Вөлі асыв шудаджык на вөтсьыс.

Керкаө гөрд ручөн пырис шонді –
Пызан вылын ыджыдавын пондіс.

Чөсмасис пось пачысь петөм няньнас –
Му вылас став шаньсьыс медся шаньнас.

Пөжасис водз асывсяньыс мамө –
Ставсө вөчис кужысь киөн-сямөн.

Пуктіс сьөлөм пымсө тайө уджас –
Няньнас сійө шондіыслы вуджис.

Чөсмасис – да петіс өшинь сайө,
Лун төв бордйөн енэж шөрас кайис,

Медым некор куслытөмөн лоны –
Видзны биас мамлысь сьөлөм шоныд.

* * *

Тöлысь бансö тöv ныр окаліс,
Ывлаыскöд сьöлөм шогалис.
Коркö тöвлөн кадыс помасис –
Енвевт шöрас шондi домасис.

Керка вывсянь лымйыс гыпмуні,
Сиська биён лача ыпмуні
Сьöлөм пытшкын, быттьö вичкоын –
Шогыс дугдiс лолöс личкыны.

Бара расыс югыд шöвкъяса...
Водзö вылö мича мөвпъясыс
Бара сьöлөмöйлы колöны –
Сэтчö вичкоö моз волöны.

И мед пытшкын норыс кылö на –
Муна расас, лэбач сьылöмас:
Вылысь лёксö лым моз гылöда,
Важсö зараванас кылöда.

КУИМ ГОЖСЯ СЕРПАС

I

Кыркөтш улын гожйөдчөны пыжъяс –
Енэжөдыс ветлөдлөны ыжъяс.

Майбыр, өні лунъяс сэтшөм кузьёсь!
Өшинь вылын гожөм, кань моз, узьё.

Шаня сылөн мойдөм улө овсьё –
Сійөс весиг лов шыён ог повзьёд.

Асывсяньыс шуда ывла вылыс –
Шонді пуксян кадыс ылын-ылын.

Сыланкывсө вывсянь колип кисьтө –
Морөс кудйө сыланкылыс письтө.

Шань да югыд мөвпъяс сьөлөм пиам
Бордьясьөны, быттьө лэбачпиян.

II

Турунвиж джодждөра гожөмыс павкнитіс,
Видз пасьта дзоридзьяс ки тырнас сьавкнитіс.
Мудзөма карсьыс, и мудзөма олөмсьыс –
Бөр, гашкө, кыпавла видз вылас волөмсьыс.

Ичөтик бипур моз енэжас ловзьөма,
Исковтө шондїыс кокньыдик тшынөдыс.
Быттьөкө син ёран югьдсьыс повзьөма –
Вералө му весьтас бобулөсь сынөдыс.

Туй вывсьыс кежөма, турунвиж шөвк вывтї
Восьлала өтнамөн төврукөд ордйысьтөг,
Төждьястөг-шогьястөг, майшөдлан мөвпьястөг,
Ачым сэн, видз вылас, бобув моз бордьясьла.

Дзоридзьяс сывьяла, мусаөс быттьөкө,
На дорын сөмын и сьөлөмөн пөтла ме.
Мед сөмын помасьтөдз ас мортөн лыддисны,
Мед сөмын дінсьыныс менө эз вөтлыны...

III

Өшйис сынөдас прөшви серөн –
Воис асылыс шонид зэрөн.

Быттьө няньшомөс, мусө көтіс –
Лун шөр гөгөрыс сэсся пөтіс.

А ме, кобис да, ывлаас петі –
Юрси шыльөдны лун төвлы сеті.


Мыччис шондыс катшасин юрсө,
Кисьтіс олөмө ышөдан бурсө –

Пытшкын эскөмсө аскиө нуны:
Лоө шудаөн аскиа луныс...



СЫЛЫ,

КОДІ ДОНА...



* * *

Арся ывлаыслөн норысь,
Зэрлөн баййөдлана горысь
Тайё сьыланкылөс босьта,
Сэсся өшинь сылы восьта –

Медым лэбё арся расё,
Кутлө ыргөн кыз пуяссё,
Сэсся арся вой төв гыё
Кыптё вичко жыннян шыён.

Медым ылі грездө волё,
Көні сьөлөм дойөй олө,
Коді олөмысь на дона,
Кодтөг нэм чөжөн ог шонав.

Тайё эскөмөн и ола:
Сьыланкывйөй сьөдз волас,
Сылы сьөлөм шөрас инмас,
Коді енвевт рёма синма.

Абу унатор и корысь:
Мед көть, нинөм абу дорысь,
Вөлі радейтөмөй сылы
Көть нин арся сьыланкылөн.

ЮЛЯ

Кыдзи тай шондіыс кымөра уляс –
Здукъясөн нюмтө мем вичмөдлан, Юля.

Вильшасян, ме гөгөр каньпи моз дуран –
Кутлыны-сывйыштны коркө мөй сюран?

Каньпи кодь муса, да каньпи кодь дурысь...
Скөрма, да чөвта и лолысь, и юрысь.

Дойяссыс дорйысьө керкаөс пөрта –
Өдзөсөс тувъяла, ачымөс йөрта.

Ывлалы, шонділы, енвевтлы быра –
Мед сөмын тэ некор синмө эн пырав.

Ньөти ог пов, мый съод гажтөмыс суас:
Лөсьөда каньпи да Юляөн шуа.

Радейтчан биын ми ловъясөн сылам!
Йөзсяныыс – дивитөм сөмын и кылам.

Олөмыс дойдө сюрс вежөгтан синмөн –
Доналөм көртөн быд видзөдлас инмө.

Ме тэныд – пыкөд. И тэ меным – пыкөд.
Босьт менө киөд, да мөдөдчам кыкөн

Сэтчө, көн кыасьыс шондыс чужө –
Көн став ловьяыс радейтны кужө.

Көні оз артасьны эмбурөн-сьөмөн!
Ловьяыс ловьялы бурсиө сөмын.

Кыкөнлы миянлы уна-ө колө?
Мөдөдчам сэтчө, көн гожөмыс олө.

Көні веж лысва сюрс дзирд вылө изсьө!
Көні быд пу вывсянь сьыланкыв киссьө.

Көні лөнь рытпомас лөзыюгыд чөлысь
Видз вылас гожъявтөм вир-яя төлысь

Кокъяссө лысванас мыськыны лэччө –
Босьт менө киөд да мөдөдчам сэтчө!

Эновтан кө – эновт...
Быттьо усьысь кодзув,
Исковт менам нэмысь –
Кута овны водзё.

Кута овны-вывны,
Шогсьыс сись моз сывны...
Олём шыяс кывны,
Ачым воча съывны –

Сы йылысь, мый вөлі
Менам нэмын муслун.
Сійö, чайтис сьөлөм,
Некор оз и куслы...

Пөръялан кө – пөръяв!
Тэд ог көвьясь кортөг.
Ме öд абу бөръя
Муслун воштысь мортыс.

Орччөн кө ог инась –
Тэтөг туйö мöда.
Ог нин югыдінас –
Гажтöмас да сьöдас.

Югид чиртөм тшемас
Воша сёр-ö, водз-ö –
Бырö менам нэмысь
Туйсö индысь кодзув.

Эновтан кө – эновт...

ЗАРНИ ПОС...

Шондыс көть ывла вылас сар на,
Сөмын войыс чиган юр кодь съöd.
Бергöдчöма ывла вылыс арлань,
А ме бара гожöмсьыс эг пöт.

Шондi жарнас лолöй эз на небзы,
Кöдзыдсьыс эз мездмы морöс куд...
Еджыд юсьөн енвевтöдыс лэбзьö
Гожöмыс – и видлы сийöс кут.

Ар да гожöм костын бөрья здукьяс...
Шондi дзирдсьыс дорöм зарни пос!
Горт гөгөрöй век на дзоридз тугья,
Ывла вылыс шондиa и кос.

А кор помтöм зэрыс оз на кожгы,
Руö оз на дзедьсы мöдлапöв,–
Сьöлöм вылö, ывла вылас моз жö,
Ньöжйöникөн пуксьö югыд чöv.

Лов пытшкö зэв лöсялана вуджö
Тöвруыслөн мыла юрган гор.
Босьтчö ывла рöмьяс вежан уджö,
И ме сыысь ывласö ог ёр.

Сöмын – жугыль грездас мем, и карас
Öти кывйö кадыскöд ог во:
Сыысь водзвыв шогöдö нин бара,
Мый и арыс пöттöдз оз жö ло...

* * *

Асывсянь пемдытөдз парматі шөйта,
Кокньода сьөлөм да пальода юр.
Регыд нин гылалөм кор пиө вөйтас
Төв нырыс давьяс, и егыр, и нюр.

Ыпъяв на, ар! Югыд рөмъяснад пөртмась!
Зарниысь кисьтөма расын быд ув.
Ылөдлас ас дінас воөм нин гөрднас
Шондіа керөсө пев гырся пув.

Буракө, гозтөм на, чипсасьө сьөла...
Юр весьтын пожөмас чеччалө ур.
Нывбаба гожөмлөн небыдик чөлас
Вөрас быд пулы, быд пемөслы бур.

Ветлөдла арыскөд нөрысьяс пөлөн,
Пармаас синваөдз муса быд мыр –
Здукьясөн весигтө пола, мый сьөлөм
Сьөла моз егырас жбыркнитас – жбыр!..

* * *

Кыпавліс мед сьёлём –
Волы татчө, төлөй –
Эзысь бордя лов.
Чужан талапөлөс
Вөйтлы эзысь чөлад –
Унджыкыс оз ков.

Ичмонь бана тулыс,
Төвся чөвсө нулы –
Югөрьястө кой!
Сет на мездлун мулы –
Раслы, видзлы, юлы –
Унджыкыс оз ков.

Медым пөтка койтис...
Медым коми войтыр
Аскисыс эз пов –
Гажнас-уджнас ойдис,
Оліс ыджыд дойтөг –
Унджыкыс оз ков.

А ме таладорө
Аслам нэмө кора
Мойд, да нянь, да сов!
Мед бур йөзлы кола,
Да мед дырджык ола –
Унджыкыс оз ков.

ЮРИНДАЛЫСЬ

Кодзула эжа

| | |
|--|----|
| «Кор вёртассо шоныда сывьялө кыа...» | 4 |
| «Лёсасьяс ог вöчав...» | 5 |
| Дзоридзьяс | 6 |
| «Ловтö и вежöртö бонзьöдö олöм...» | 7 |
| Тöвся сёрни | 8 |
| «Мыйла нö арлыдтöг кулид...» | 10 |
| «Му весьтас вой тöв ыджыдалö – ар нин...» | 11 |
| «И бара войыс лунсö венö...» | 12 |
| «Асыввывсö алöй кыа визьö...» | 13 |
| «Кöть кольöма радейтан кадыс...» | 14 |
| «Рифмуйтли мусö и вöрсö...» | 15 |
| Турунвиж | 16 |
| «Зэрö век, оз ланьтлы лич...» | 17 |
| «Шоньд зарнийн ывлаыс тырас...» | 18 |
| «Гожся лун йывсьыс мый нин и шуны?...» | 19 |
| «Ошкамöшка мегыр улын вöлөн...» | 20 |
| Жов пу | 21 |
| «А грездö век кыскö – эг мездьсь...» | 22 |
| «Ыпмунли гөгөр – и куси...» | 23 |
| «Луннас зэрö. Войнас йизьö...» | 24 |
| «Кусöм водзас кодзув...» | 25 |
| «Зэрьясысь увтыртны арсö ог кöсйы...» | 26 |
| «Ошинь улысь сямöд дозйын пукта...» | 27 |
| «Лолын öнöдз на эз кув...» | 28 |
| «Кöть нывбаба гожöмыс гöстя моз волис...» | 30 |
| Рубина | 31 |
| «Кор ывла вывсö ыркöдыштас арыс...» | 32 |
| «Уна шог на менö...» | 33 |
| «Кор лымйыс тöдса видзьяс вылас водас...» | 34 |
| «Войыс енвевт шөрö кольквиж табсö чöвтис...» | 35 |
| «Во помын войясыс чөлöсь да кузьöсь...» | 36 |
| «Ю весьтын потан кодь гатшасьöм тöлысь...» | 37 |

| | |
|--|----|
| «Кусі төвся төлысь сиськыс...» | 38 |
| «Тулыс төвсө пөрөдіс...» | 39 |
| «Асья пемыдыс рытъясө судзө...» | 40 |
| Лья ді вылын | 41 |
| «Муслун йылысь гижә...» | 46 |
| «Ыджыдалө ывлаас тувсов олан лад...» | 47 |
| «Мартнас, кор ывлаыс югдө...» | 48 |
| «Эз нюмунлы төлысьнас, сьод вөлі войыс...» | 49 |
| Волі сиктө... | 50 |
| ...Карын | 51 |
| «Оз нин ков – да шляча петіс бара...» | 52 |
| «Садьми водз да муні мусө-васө...» | 53 |
| «Олөмыд – олөм. И зумыш, и шань...» | 54 |
| «Асьявылыс пышйис войся чөлыс...» | 55 |
| Шуда кадө | 56 |
| «Энлы дойдны менө, энлы!..» | 59 |
| «Тайө өмөй олөм?...» | 60 |
| «Регыд пельыс өзтас еджыд тугъяс...» | 61 |
| Пышкай | 62 |
| Шуда вөт | 63 |
| «Кадыс лөсьыд!..» | 64 |
| Төвся мойдъяс | 65 |
| Сиктса бияс | 69 |
| «Рассө зарни пөткаөс моз куштө...» | 71 |
| «Жугыль арся лунө...» | 72 |
| Коді мыжа | 73 |
| Ыджыд лун | 74 |
| «Еджыд кымөрсө льөм пуыс вожъяснас тывйыштіс...» | 75 |
| «...Кор тулысыс ар кодь шуштөм...» | 76 |
| Май шөрын | 77 |
| Тувсовья вадорын. Рытъя войө | 78 |
| Кор локтө веж тулыс | 79 |
| Паркын | 83 |
| «Весьтын кельыда дөввидзө төлысь...» | 84 |
| «Вөйлі долыдас и шогас...» | 87 |
| «Лөнь на. Төвру оз на ризьяв...» | 88 |
| «Көні зысы горнас чужө юыс...» | 89 |
| Шойна вылын | 90 |
| «Дөзма – карсө ёра...» | 92 |

Мөдлапөлас... Талапөлас...

| | |
|--|-----|
| Морт нэм | 94 |
| «Кор дөрөм соссө рыгыс көрас...» | 95 |
| Мөдлапөлас... Талапөлас... | 96 |
| «Шоныдыс кольөма войт...» | 99 |
| «Кыа ветліс шондыскөд гөзйөн...» | 100 |
| «Тупкин енвевтсө роч нойөн...» | 101 |
| «Лыска пуяс кындзи...» | 102 |
| «Төвсьеыс быдсөн пола...» | 103 |
| «Арсьеыс ывлаыс важөн нин бурдөма...» | 104 |
| «Кор льөм пу кисьтө лымсө менам садьё...» | 105 |
| Августын кисьмөны кодзувьяс | 106 |
| «Гожся шондыс енэжөд уйё...» | 113 |
| «Йёрын вижьюр дзоридзьяс пёрысьмисны-дзормисны...» | 114 |
| «И вот – сентябрь!...» | 115 |
| «Ныжмисны шонділөн югөрьяс-ньөвьяс...» | 116 |
| «Чужанінөс серпасалё бара...» | 117 |
| Нывбаба гожөм | 118 |
| «Лэбувьясө арся помтөм зэрсьеыс...» | 119 |
| «Гожйөдчысьеыс вадорьясыс бырө...» | 120 |
| «Помасьө гожөм. Оз югьяв веж асылын лысва...» | 121 |
| «Со и коли луныс. Бара пемдіс...» | 122 |
| «Лолөй, коньөр, йизьөма...» | 123 |
| «Куйлігад ньылөм оз киссьеыс...» | 124 |
| «Нэмад шуд он судзөд...» | 125 |
| «Кодлөн нывтор, кодлөн питор...» | 126 |
| «Кор төлысьеыс, быттё виж таб...» | 127 |
| Ичөтдырся | 128 |
| «Төлысь бансө төв ныр окаліс...» | 129 |
| Куим гожся серпас | 130 |

Сылы, коді дона...

| | |
|---|-----|
| «Арся ывлаыслөн норысь...» | 134 |
| Юля | 135 |
| «Радейтчан биын ми ловьясөн сылам!..» | 136 |
| «Эновтан кө – эновт...» | 137 |
| Зарни пос... | 138 |
| «Асывсянь пемдытөдз парматі шөйта...» | 139 |
| «Кыпавліс мед сьөлөм...» | 140 |

Литературно-художественное издание

ЕЛЬКИН Михаил Андреевич

ЗВЁЗДНАЯ ЦЕЛИНА

Стихи

На коми языке

Художник Лисовский Ю.Н.

Редактор Ветошкина Е.В.

Компьютерная вёрстка – Симпелев П.И.

Корректор Габова Н.Ф.

Подписано в печать 12.07.2013 г. Формат 70x100 ¹/₃₂
Бумага офсетная. Гарнитура «Times». Печать офсетная
Уч.-изд. л. 5,40. Усл.-печ. л. 5,80. Тираж 1000 экз. Заказ 4101

Союз писателей Республики Коми
167982, г. Сыктывкар, ул. К.Маркса, 229

Отпечатано в полном соответствии с качеством
предоставленных материалов в
ООО «Коми республиканская типография»
167000, г. Сыктывкар, ул. В.Савина, 81

ISBN 978-5-7934-0545-4



9 785793 405454

